

Mak ma Peba Makimna Iríki God ma B'ogil Yírkokar Bage Yít Isípkita Yítkak

Onggityam God ma b'ogil yírkokar bage yít peba iríka ríga re Makte. I frigap kwa ija na Makind nyi yógenaeneno da “Yoan Mak”. Si Mak onggityam peba yírikonj re God ma obagiki kesa gar ke utkunda ríga wa pilwa na yepiya re wekenonj Roma wa. I iminjog e da tontaemb ji ríga yet re jogjog kemag kima Misnari wiko yomnikenenonj yipand Pol ake Banaba kima. I ija e wip da Makit ama ríka naskajog peba yírikonj Yesumna mile gatab rína re aukito Tina yírkokar wímena wingirind onggít gowukoyind.

Mak tina peba yotom re onggít b'ogil yírkokar bage yít kae it re da, “Yesu Keriso re God ma b'iga e.” I Yesund odede wip e yongwas da, “Ton re omníka ríga e dide juwai kima ríga e.”

I ton ina dimdim iríka eyeninonj nangga mile na re pita aukito aji mogjog re Yesum gatab na. I ket yisípkeny momta kupka peba wingirind, Yesumna kikitumam wikind mile omníki onggít gowukoyind. I ket peba yundwas re Yírkokar Okawa Rigamna uj dide utnyita gatab yítkak kae.

*Baptiso Omníkayam Yoan
(Mat 3:1-12; Luk 3:1-18; Yoan 1:19-28)*

¹ Itemb ji Yesu Keriso, Godim b'igamna otobarki b'ogil yírkokar bage yít.

² Si ija emb ji baptiso Yoan gatab iriki yibim bageyam Isayamna peband da,
“Man yir de, ita kon koina bageyam itmikisn dem mor naska nya wa.

Tonte nya motngonjenau dem.

³ I dide ita ukoi ara b'emoka pita tainy dem wul kesa tunggind da,
‘Win Yonggyamim nya ispikaindam,
i Tina menonpu nya dimdim omnikaindam.’”

⁴ Si ket Yoan yikonj wul kesa tungg wa, i ket riga baptiso amnikinonj dide ket engenda baptiso yit pitapita yomnenonj negir mile ewaikitam gar ke. ⁵ Si kupkakupka Yuda eriya ke dide komkesa Yerusalem ke riga wuwenonj ti pilwa. I rigap towalenggyam towaina omniki negir mile pitapita omnena eyento, ngirpu onggit kak ke ket baptiso yokateno Yoanim pilke Yordan kilimind. ⁶ Yoan kobirgim b'ikoki eyenonj tina jiwind re kamel ngii ke omniki na, aji ma b'ogil na. I kwa ton rob b'ibgi yiyanonj re b'angga gim ke omniki na, aji ma b'ogil na. I dide ti owou re nok na koka ake tibam wui. ⁷ I ija naemb ji ton yitkak pitapita yomnenonj da, “Kor kak ke ita ik yipa dandajog riga yaina danda re Ti pumbjog wa e aji koina re goujog wa e. Si kon makwa ririr en uwontam Tina yonginkak kai itrekam rina ra goujog wiko rigat mile omnik obayamim pilind.* ⁸ Si kon nyi kaim wen baptiso amnikinyin, aji Ton Yinayina Wingawinga kaim wen baptiso tamnikiny dem.”

* **1:7:** Onggit winind obai omniam re ija emb ji ra obayam ik yipa met wa, naska onggit met goujog wiko rigat tina yonginkak tatogikiny i dide tina pis tesek. Yimta ke met wingir wa obai omny.

*Yesu ma Baptiso dide Otonkena Okatam
(Mat 3:13–4:11; Luk 3:21-22; 4:1-13)*

⁹ I re Yoan riga baptiso amníkinonj, Yesu ikonj Najaret tungg ke Galili eriya wingirind, dide ton ket baptiso yokatonj Yoaním pilke Yordan kílimind. ¹⁰ Si re Yesu sisil opendonj nyí ke, i odenja wub kumb yír yongonj ipangendand dide Yinayina Wingawinga eyouka ikonj ti pilwa ija na it re gimai re dide. ¹¹ I ket ara ikonj wub kumb ke da, “Man re Koina b'iga et yena re Kon singi iyenyen. I Kon ukoi sam en Mornim.”

¹² I odenja Yinayina Wingawingat Tin yitmíkitonj deta wul kesa tungg wa. ¹³ Si adea ta Ton yibnonj wul kesa tungg wa poti (40) bibir kima, dide ademb ji Ton otonkena yokatenonj Satanam pilke. I Ton tibam b'angga kima na yibnonj dide anerupiya tin yír ipka iyieno.

*Naskajog B'auyaena Riga Imda
(Mat 4:12-22; Luk 4:14-15; 5:1-11)*

¹⁴ I re ket King Erod Yoanind sibibmet wa yoramitonj, onggít kak ke Yesu ket yikonj Galili wa, God ma b'ogil yirkokar bage yit pitapita omnena iyionj da, ¹⁵ “Itemb ji ket Godimna obagendi win ririr ainy, God ma pumb tungg ke wa wus nate ainy. Si win negir mile ke gar engenjinam de Godim pilwa, dide gar ke utkunda ke yokata God ma b'ogil yirkokar bage yit.”

¹⁶ Yipa winind, re Yesu ton ket menon yokatonj Galili sipa yurund, Ton ket nimog nanyínggan yír angonj, Simon ake Andrea. I onggít winind osiemb nanyínggan sipa wa gir b'iskena nat ebnonda, nokip ton re kabum iwika riga na ebnonda.

17 Ngirpu ket Yesu ara emokonj da, “Ayo tetka! Yimta nundoka! Ḧ Kon riga iwika riga mi wen tamnyin odede ringmi re win kabum iwika eyeninya.” **18** Ḧ odenja ton gir erarkinonda dide ton ket Tin yimta yundokonda. **19** Ḧ ingkek ket Yesu sobijog b'isonkitonj, kea ton yir angonj Jebedaimna b'iga nimog Yakobo ake ti yinggan Yoan, gir ongonjenand gigand. **20** Ḧ odenja Yesu ket ten ara emokonj Tin yimta undokam. Seg ton ket nanyinggañip towa b'u Jebedaind yiraronda gigand towaina wiko riga kima, i ton ket Yesund yimta yundokonda.

*Yesu ma B'ogil Ouyaena
(Luk 4:31-32)*

21 Ḧ ton wuwonj de Kaparnaum wa. Re ket Ju riga waina wiram dide yir opmitena bibir awonj, odenja ket Yesu yikonj de Ju riga waina yir opmitenapu met wa, i Ton ket riga auyaeninonj. **22** Si rigap ma sobijog na kid kesa aento Tina ouyaena ke. Mop nokip Ton auyaeninonj re odede na it re Godimna danda kima riga re dide, aji ma ija na ite re Ju riga waina gog ouyaena riga re dide.

*Yesu Negir Wingawinga Yewaikitonj
(Luk 4:33-37)*

23 Ḧ demb de onggit Ju riga waina yir opmitenapu met wa kea de ton yipa negir kilkil wingawinga ma okati riga yibnonj. Ḧ odenja ton irere kima b'okta ara yikenonj **24** odede yit kima da, “Yesu Najaret tunggam! Nanggamog e Man sowa pilind singi yomnyit? Ringma, Man negir omna mim sin notupinyit? Kon wumir en yetet Man. Man re Godimna yinayina B'igatet.” **25** Aji Yesu itemb ji

negir wingawinga samany yiyowonj da, “Muma kesa ae! Or opende ti pilke!” ²⁶ Yesumna yitip ket itemb negir wingawingat itemb riga isanikesa yijindenonj. I ton ket ukoi kana ara yikenonj, ngirpu opendonj rigam pilke. ²⁷ I komkesa riga onggit b'eoma wingirind ma sobijog na ton kid kesa aena wuwenonj i towalenggyam b'arkena wuwenonj da, “Wii, nangga e ji? Sisil b'auyaena e, danda kima e. I negir kilkil wingawingap kea daka tin yit yutkunji ite re ton b'ingawa yoramiteny towa pilind.” ²⁸ I rawir kwa pin komkesa yit yikenonj Yesumna kid kesa kima danda wiko gatab komkesa Galili eriya wingir nata.

*Yesu Kopa Riga Esakenjinonj
(Mat 8:14-17; Luk 4:38-41)*

²⁹ Re ket seg, odenja Yesu Ju riga waina yir opmitenapu met yiraronj. I Ton ket yikonj Yakobo ake Yoan kima de Simon ake Andrea waina met wa. ³⁰ I Simonim konggayam jeam re pas nat wiibnonj juwar map. Odenja ton ket Yesund wumir yomno ti gatab. ³¹ I re ket Yesu yikonj de Simonimna jeamim pilwa, Ton ket kea yim ke wokatonj i ket wurowatonj. Seg ket juwarit tin wiraronj, si ton ket Yesund dide Ton kima meni riga yim akainonj. ³² Onggit si imokand, lom ipanjiki kak ke, kea rigap eyento komkesa kopa riga i negir wingawinga ma okati riga de Yesum pilwa. ³³ I ket komkesa riga onggit taunind bobo auka wuwenonj mora wa. ³⁴ I Yesu esakenjinonj jogjog kopa riga yepiya re b'engabenga wiip kopa kima wuwenonj, dide kwa ton jogjog negir wingawinga eaukena eyeninonj riga wa pilke. Aji

ton maka enjikisinonj negir wingawinga yit opurenam, mop nokip ton get ke wumir na da Yesute.

*Yesu ma Yır Opmita dide Tina Wiko
(Luk 4:42-44)*

³⁵ Siwiny borand momta isparkand ket, Yesu utnyitonj dide yikonj deta tintawar wa, i ademb ta ket ton yır opmitenonj, ³⁶ ngirpu ket Simon Yesund oraka yiyonj nında ti rigawar kima. ³⁷ Re ket yodaro, Yesund wumir yomno da, “Wii, komkesa rigap oraka miyenyi.” ³⁸ I Yesu daka ket amninonj da, “Tuyim! Men wuyin ta b'enga gatab wa deta ninda wuswus tungg wa, nokim da idenat Kon towa daka Godimna yit pitapita tamnenainyin. Mop nokip Kon onggit mop penaemb netkond onggit gowukoi wa.” ³⁹ Si re Yesu ket yikenonj kup-kakupka Galili eriya wingirind, ton ket Godimna yit ouyaena eyeninonj Ju riga waina yır opmitenapu met nata, dide kwa ton negir wingawinga eaukena eyeninonj riga wa pilke.

*Yesu Leprosi Kopa Riga Yisakendonj
(Mat 8:1-4; Luk 5:12-16)*

⁴⁰ Ngirpu ket yipa leprosi kopa riga ikonj de Yesum pilwa, kumsos b'amkonj, i Yesum pilwa b'iten a yoramitonj da, “Ra Man singi taet, Man ririr e ken kilkip kesa notinyit.” ⁴¹ Si Yesu re ma sobijog na kear yomnonj, ingkek ket yim b'itnikonj dide ket tin yesopayonj odede yit kima da, “Kon ita singi. Kilkip kesa ae!” ⁴² Si odenja ket it ra leprosit tin yiraronj, ngirpu ton ket b'isakendonj dide ket kilkip kesa awonj. ⁴³⁻⁴⁴ Seg Yesu ket itemb ji riga yit ke ukoi danda kima odede nonony yomnonj da, “Yır de, goro yama na usekainim

dor. Aji meke dide ket molenggyam b'atouyaet yina si rigam pilwa. Ra ton imjas dor da, ‘Kea man iminjog b'ogil dide kilkip kesa aet,’ si man ket Godim si gasa tanggikinyit dor i eyinyit de yina si rigam pilwa si omnikam rina re Mose b'ingawa yoramitonj. Nokim da idenat ton mitimjas riga wa wipind da, ‘Man kea b'isakenjit dide kilkip kesa aet.’ ” ⁴⁵ Aji re ton Yesum pilke ewaikitonj, ita ton ket yit pitapita yomnenonj dide yit ukoi warabag omnika yiyanonj. Onggit mopip ket Yesum ma ririr na awonj taun wa menamenam pitand. Si ton adea ta taun bau ke riga kesa tungg nata yibnonj, aji kea tin kwa rigap yodareno komkesa gatab ke.

2

Yesu Yipa Dimir Kopa Riga B'ogil Yomnonj (Mat 9:1-8; Luk 5:17-26)

¹ Ninda bibir kak ke Yesu kwa b'usaya b'igaronj de Kaparnaum taun kara bora wa. I yidir yit re kea yikenonj ket da ita Ton de onggit met wa. ² I re ket jogjog riga bobo auka wuwenonj onggit met wa rikind re Yesu yibnonj, si itemb met re kea gangga kesa awonj dea ta ngirpu mora dunda wa dide daka kwa mora bau ke. I Yesu ket God ma yit usenenainonj. ³ I ngirpu ket ninda rigap yipa dimir kopa riga titind iyo Yesum pilwa. ⁴ Aji towanim re ma ririr na kopa riga iyoyim de Yesum pilwa riga jogjogip. Ton ket bau ke tit na ket ijo i wuwonj de ket met papkak kumb wa, ngirpu ket ton tumind ouki gasa yotorko, i Yesum tunkipind bora yomniko. Re ket seg, i ket itemb tit rikind re dimir kopa riga yutungi yibnonj, inka yiyo de Yesum wip wa. ⁵ Si re Yesu towaina gar ke utkunda

yir yongonj, Ton yomnonj ket itemb dimir kopa rigand da, “B'iga! Moina negir mile kemb awir auranj.” ⁶ Aji ninda Ju riga waina gog ouyaena riga yepiya re de wekenonj, ton towaina garind b'arkena wuwenonj ⁷ da, “Nangga mop pae ton riga ji odede yit apureniny? God na yisadreny. Yete ririr e negir mile awir omnikam? Aji Godta tinta yipaina.” ⁸ I kea ton Yesu odenja tina wingawinga ke wumir yokatonj rija na re Ju riga waina gog ouyaena rigap Tin yit yipateno towaina garind. Yesu ket amninonj da, “Nangga pae win odede b'iklawa yit yiyeňa waina garind? ⁹ Rinte yit opulitam wewa ainy de itemb dimir kopa rigam pilwa da, ‘Mor negir mile kemb awir auranj,’ o omniam da ‘Utnyite! Tit yurowate, i menon yokate?’ ¹⁰ Aji Kon yipa gasa e omniken wen ouyawam da Rigamna B'igam ita Tina danda gowukoyind negir mile awir omnikam.” I Ton ket dimir kopa rigand yomnonj ¹¹ da, “Kon motinyin. Utnyite, moina tit yurowate, i moina met wa meke!” ¹² Seg re ket dimir kopa riga utnyitonj, odenja tit yurowatonj, ngirpu ket menon yokatonj riga wa wipind. Onggit mopip komkesa riga kid kesa aukito i odedep ket Godind yesoureno odede yit kima da, “Makwa sin odede wip gasa yir yongonda naskand.”

*Yesu Teks Imdayam Lebind Ara Yemokonj
(Mat 9:9; Luk 5:27-28)*

¹³ I re Yesu kwa ket yikonj sipa yurund, ukoi riga bobo wuwenonj Ti pilwa, ngirpu Ton ket ten auyaeninonj. ¹⁴ I re Yesu itemb pipmet yiraronj, Ton kea Alpayomna b'iga Lebind yir yongonj omiti teks imdapu metind, dide ket tin yomnonj da,

“Yimta nundoke!” Ngirpu ket Lebi utnyitonj dide ket Yesund yimta yundokonj.

Yesu Negir Mileyam Yirkokar Okawam Tatupinonj

(Mat 9:10-13; Luk 5:29-32)

15 I re ket Yesu diyam awowind yibnonj Lebimna metind, si jogjog teks imdayam riga dide negir mileyam riga kea de wuwenonj onggit met wa i ket Yesu dide Tina b'auyaena riga kima yipand diyam aukito.* Mop nokip ma yipa kima odede rigapiya Yesund yimta yundoko. **16** I Parisai riga wa wingirind ninda Ju riga waina gog ouyaena rigap keat† Yesund yir yongo diyam awowind yipand negir mileyam dide teks imdayam kima. Onggit kak ke ket, ton Yesumna b'auyaena riga egekitto da, “Nangga mop pae Ton diyam ainy yipand teks imdayam dide negir mileyam kima?” **17** I re Yesu odede yit utkundonj, Ton ket ten amninanonj da, “Ma kopa kesa rigapim dokta singi omnyi, aji kopa kima rigapim. Kon ma negir mile kesa riga na tatupinond engendam negir milem pilke de Godim pilwa, aji negir mile kima riga na.”

Owou Uwabika Win Okata gatab Yit

(Mat 9:14-17; Luk 5:33-39)

18 Yoanimna b'auyaena riga dide Parisai riga re owou uwabika win na yokateno, aji Yesumna

* **2:15:** Ju rigap opimemb riga negir yir kena yir ongong eyenento, nokip ton gog yit maka yimta undoka eyenento. † **2:16:** Ton kesam yina peba gog dide towaina dad ke b'isateni gog owama riga im. Aji ton re gim ke b'ogil aji ngor wa negir mile na amnikento. Si onggit penaemb Yesu ten samany iyowa eyeninonj.

b'auyaena rigap re maka yokateno. Si onggit penaemb kea ninda riga tuwonj Yesum pilwa dide ket Tin yerkeno da, “Nangga pae Yoanimna b'auyaena riga dide Parisai riga waina b'auyaena rigap owou uwabika win yokatenyi, aji moina b'auyaena rigap re ma ita ton owou uwabika win yokatenyi?” ¹⁹ I Yesu ten mira amninonj da, “Ringma, ririr e ton sisil kongga kima rigamna rigawarip owou uwabika win okasi, ra ton sisil kongga kima riga dikinda towa wingirind ibim? Ma ririr e towaniṁ owou uwabika win okatam. Mop nokip sisil kongga kima riga re ita dikind ton kima yipand yibim. ²⁰ Aji ita win ik dem, ra sisil kongga kima rigat tewaikis dem towa pilke, si onggit win natemb dem ton ket owou uwabika win okatenyi dem.

²¹ “Makwa ita yipa rigat sisil kobirgim kib ke kesam kobirgim bora pasi ominy. Ra ton odede pasi ominy i dide ra itemb pasi omni kobirgim nyi ke isek, ita sisil kobirgim kib b'itinkur aji kesam kobirgim ma ita b'itinkur. Si onggit paemb itemb sisil kobirgim kibit ita kesam kobirgim inyowik dor pasi omnipund. Si negirjog ukoi bora emb ket pita tainy. ²² I dide makwa yipa rigat ita sisil ik tangjikiny kesam b'angga gim ke omniki ik ga wa. Mop nokip sisil ik ita inika ik, aji kesam b'angga gim ke omniki ik ga ra ma ita warabag tawik. Si ra ton odede omnik, itemb sisil ikit opima onggityam kesam b'angga gim ke omniki ik ga temkiny. I komkesa negir taukanj, ik dide b'angga gim ke omniki ik ga. Aji sisil ik im tangjikiny de sisil

b'angga gim ke omniki ik ga wa.”†

*Ju Riga Waina Wiram dide Yir Opmitena Bibirim
Yonggyam Yesu
(Mat 12:1-8; Luk 6:1-5)*

23 Yipa Ju riga waina wiram dide yir opmitena bibirind Yesu Tina b'auyaena riga kima wit sopapu yuru nata yikonj. Towa menon wingirind, Yesumna b'auyaena rigap ket wit kolkak yipayipa utouka eyento. **24** ¶ Parisai rigap ket Yesund yomndo da, “Yir de, nangga pae ton Moina b'auyaena rigap onggityam mile yomniki rinte re ma yiayag e omnikam meraina wiram dide yir opmitena bibirind?” **25** ¶ Yesu ten mira amninonj da, “Ma ke win yina peba yogenkonda onggityam yitkak gatab rina re Dawid Mosemna gog yit yerbekonj, re ton dide ton kima meni riga gasa b'arakand dide owoupand wekenonj? **26** Si onggit winind re Abiyatar yina mopyam si riga yibnonj, ride de na ton b'igaronj Godimna yinamet wa? ¶ ride de na ton yina sana awinonj rina re gog yibnonj komkesa riga wa owowim aji yina si riga wa nena ma owou? ¶ kwa daka ride de na ton onggityam yina sana ninda ton kima meni riga wa akainonj?” **27** ¶ Yesu kwa amninonj da, “God re meraina wiram dide yir opmitena bibir yoramitonj rigam b'ogil mana, aji riga re yomnikonj ma meraina wiram dide yir opmitena bibirim b'ogil mana. **28** Si onggit paemb Rigamma B'iga re Yonggyam e

† **2:22:** Yesu nok ma yinden da ra rigap kesam gog kima mile ke singi omnyi Tina sisil yirkokar mile omnikam, itemb re ji yipa wip e odede nony kesa mile osi re sisil kobirgim kib ke kesam kobirgim bora pasi omnyi dide sisil ik tangijkiny de kesam b'angga gim ke omniki ik ga wa.

komkesa bibirim, dide kwa tonta Ju riga waina wiram dide yir opmitena bibirim Yonggyam.”

3

*Yesu Kopa Riga Yisakendonj Ju Riga Waina
Wiram dide Yir Opmitena Bibirind
(Mat 12:9-14; Luk 6:6-11)*

¹ Yesu yikonj b'usaya kwa de Ju riga waina yir opmitenapu met wa. I onggit metind kea de yipa yim b'ikiki kopa riga yibnonj. ² I kea de ninda riga wekenonj, i ton ket Yesund wuswus yir ipka yiye no da, “Ita yama dor meraina wiram dide yir opmitena bibirind Yesu onggit kopa rigand isakenj.” Nokim da idenat ton Yesum ril odarai Tin kot wa oramitam. ³ Si Yesu onggit yim b'ikiki kopa rigand yomnonj da, “Metkim, onyite dikind wip wa!” ⁴ Ngirpu ket ten amninonj da, “Ringma! Meraina wiram dide yir opmitena bibirind nangga mog gog e b'ogiljog tainy, gasa b'ogil omnikam o minda negir omnikam? Ringma, yirkokar okawam, o minda ongandam?” Aji Yesu ma yitit towaina gar edokinonj, si ton mumakesa yir nena na b'epkito. ⁵ I Yesu ket ukoi soro kima yirik unjomkena eyeninonj, i dide ket gar yii yindonj, nokip towaina gimo pila gar re idoki na. Ton yindonj onggit kopa rigam pilwa da, “Moina yim b'itnike!” Si ton ket tina yim b'itnikonj dide ket itemb tina yim kupkakupka b'isakendonj ija na it re yipa tab yim re dide. ⁶ Seg, Parisai rigap opeko, dide ket odenja Erodimna yimta undoka rigawar kima wipwip auto, i ket gilgil yitnono aento da, “Ridede nya kae Yesund onganju.”

*Jogjog Riga Wuwenonj Yesum pilwa de Galili
Sipa Yuru wa*

⁷ I Yesu tungg ke yiwateronj i opendonj de Galili sipa yuru wa Tina b'auyaena riga kima. I kea ukoi riga bobo wuwenonj Galili eriya ke, i kea ket Tin yimta yundoko. ⁸ I kwa riga jogjog wuwenonj Yesum pilwa Yuda eriya ke, ukojog taun Yerusalem ke, Idumeya eriya ke, b'enga tab ke de Yordan klimind, i Tiro dide Sidon eriya gatab ke. Mop nokip ton kea utkudento komresa mile gatab yit ringmana re Yesu amnikinonj. ⁹ Si re riga bobo isanikesa Ti pilwa wuwenonj, Ton yindonj Tina b'auyaena riga wa pilwa da, “Giga b'iga ongonjeni na nebna. Nokip ke rigap Ken ukoi kana negir namnike!” ¹⁰ Mop nokip Yesu kea kopa ke jogjog riga isagika eyeninonj, si ket komresa kopa kima riga isanikesa b'asmurena wuwenonj Ti pilwa Tina ji esopayam. ¹¹ Onggit winind, re negir wingawingap Yesund yir yongo, Ti pilwa sap otekto i dide ket b'okta ara wuwenonj da, “Man re Godimna B'iga et.” ¹² I Yesu ket ukoi danda kima ten eswanganonj da, “Goro ket pitapita notinenya!”

*Yesu Twelp (12) Itmikitijog Riga Abagenjinonj
(Mat 10:1-4; Luk 6:12-16)*

¹³ I Yesu yipa dor yoglonj dide ket Tina isamki riga ara emokinonj. Seg ton ket wuwenonj Yesum pilwa. ¹⁴ Seg ket Yesu Twelp (12) riga abagenjinonj i nyi aekinonj da itmikitijog riga, nokim da idenat ton wiñena tuweny Ton kima dide idenat Ton ten tetmikeniny God ma yit pitapita omnenam, ¹⁵ i dide kwa idenat towa danda tagoniny

negir wingawinga eaukenam riga wa pilke. ¹⁶ Si Ton Twelp (12) itmikitijog riga abagenjinonj re nyi opimemb, Simon ya mana re Yesu yipa nyi yokawonj Petro, ¹⁷ Jebedaimna b'iga Yakobo dide ti yinggaan Yoan yami re Yesu kwa yipa nyi towa akawonj Boanerge ongwatam yitkak da iaram b'iga, ¹⁸ Andrea, Pilip, Batolomeo, Matayo, Toma, Alpayomna b'iga Yakobo, Tadayo, Kanana riga Simon, ¹⁹ dide Yudas Iskariyot yet re Yesund tib yiyonj negir omnikam.

*Yesu dide Negir Wingawinga Mopyam Beeljebul
(Mat 12:22-32; Luk 11:14-23; 12:10)*

²⁰ Onggit kak ke ket Yesu yikonj yipa met wa. I ket riga kwa b'usaya bobo auka wuwenonj Ti pilwa. Onggit penaemb Ton dide Tina b'auyaena riga wa ma ririr na awonj gangga okatam towa diyam owowim. ²¹ Re ket Yesum mog ake Ti yinggaanwarip Ti gatab odede yit utkundo da rigap endenanj da, “Ton nony kesa e.” Si onggit penaemb ton ket wuwonj de onggit met wa Tin okatam i iyoyim de tungg wa. ²² I ninda Ju riga waina gog ouyaena rigap yepiya re wuwenonj Yerusalem taun ke, ton endento da, “Negir wingawinga waina mopyam Satana, nyi da Beeljebul, tonte Yesund yokas. Si Ton onggit Beeljebulimna danda kena negir wingawinga eaukeniny.” ²³ Si Yesu ten ara emokinonj dide tendam yit ke ten amninonj da, “Ririr e Satana eaukeny Satanand? Ma ririr e. ²⁴ I ra yipa kantri rigap towalenggyam wetaweta taukanj dide b'itpouranj, onggit kantrim ma ririr e ti onyita. ²⁵ Dide ra yipa gu rigap towalenggyam wetaweta

taukanj dide b'itpouranj, onggit guwim ma ririr e ti onyita. ²⁶ Si kwa ra Satana geja b'itiyen tina negir wingawinga kima dide wetaweta tauranj, ma ririr e ti onyita, itemb ti ngirpu dikind. ²⁷ I makwa yipa rigat ririr e yipa danda rigamna met wa b'aturik dide tina gasa yurowam ke temjiny, ra maka ra ton naska itemb danda rigand ijobik. Aji naska ton b'ogla danda rigand ijobik i yimta kae ton ket yurowam ke temjiny tina gasa komkesa leamog im re wekeny tina metind. ²⁸ I Kon iminjog wen tamninyin. Rigap re opima negir mile amnikenenan dide Godind isadrena yiyyenyi. Aji God opima onggityam komkesa negir mile dide Godind isadrena mile teomneniny dem riga wa pilke. ²⁹ Aji ra rigat Yinayina Wingawingand isadreny, God makwa ita onggityam tina negir mile awir omnau dem dadal ngirpu kesa. Aji ton itemb riga negir milem pilke dadal ngirpu kesa negir mira e okateny dem.” ³⁰ Nok pena Yesu onggit gatab yindenonj, nokip ninda rigap opurena yiyyeno da, “Yesu re ton negir wingawinga kima e yibim.”

*Yesu ma Mog dide Yingganwar
(Mat 12:46-50; Luk 8:19-21)*

³¹ Yesu ma mog dide Ti yingganwar wuwonj yipa met wa rikind re Yesu yibnonj. Re ket pund owinkito, i kwa ton ket bage yit yitmikito da, “Mor mog dide yingganwar opima pu wa yir mungai.” ³² Si leamog riga na re Yesu kima omniki wekenonj wingir wa, ton ket Yesum yit itmaikena yiyyawo da, “Wil, Mor mog dide Moina yingganwar opima Men yir mungai pu wa, i Mena orakam motupi.”

³³ Seg ket Yesu mīra amnинонj da, “Yepim Kor mog dide Koina yīngganwar?” ³⁴ Yesu rīga yīrik unjomkeninonj yepiya re Tin yewatinto dide omniķi wekenonj. I ton ket ten amnинонj da, “Yīr de, opimemb jī Kor mogwar dide Koina yīngganwar! ³⁵ Si yet ra mile omniķa teyeniny God ma singind rinsim re God ma yīna pebap apurenanj, ton re Koina yīnggan e, ton re Koina ngīmir o, i dide ton re Kor mog o.”

4

Tuny Igmarka Rīga ma Tendam Yīt (Mat 13:1-9; Luk 8:4-8)

¹ I re Yesu b'usaya ouyaena yotomonj Galili Sipa yurund, ukojjog rīga bobo auka wuwenonj Ti pilwa dide Tin yewatinto. I onggit mop penaemb Ton ma rīrīr na rīga ouyaena. Si onggit penaemb Ton ket sobijog gīga yokatonj dide omitonj gigand, nokim da idenat Ton rīga wa pilke gangga okas. Seg ket, rīga bobo sīpa yurund nyī ngīrpund wekenonj Tina yīt utkundam. ² I Ton ket jogjog tendam yīt ke ten auyaeninonj. Itemb jī ket Tina yīpa ouyaeni tendam yīt, ³ “Utkunjinam! Yīr, yīpa wala rīga tuny igmarkam yikonj sopapu wa. ⁴ I re ton tuny egmarkinonj, nīnda tuny isokto nyawīnd, ingkek ket ngena tuwonj, i ket komkesa tuny auto. ⁵ I kwa nīnda tuny isokto gīmo gou nat rīkind re ma jog gou wekenonj. I odenja wanaka īkkito, mop nokip gou re bab tum nat wekenonj i dide tuny ip kea wanakana pemb yokato. ⁶ I re ket lomkongga īlītonj, si nangg kea yarimyarīm aukīto, mop nokip ap re ma rīrīr na gīmo bora wa b'igarenam. ⁷ I kwa

ninda tuny isokto wanjametind. Seg ket wanja wanakana owinkito, i ket kea nangg ekanginto. Si onggit penaemb ton maka kip aukito. ⁸ I kwa ninda tuny isokto b'ogil sal gowind. Seg ton ket ikkito, i ket owinkito dide ket ton kip ijagikto. Si re kip aukito, ninda tuny re teti (30) kip, i ninda re siksti (60) kip, i kwa ninda re andred (100) kip.” ⁹ Yit seg re ket, Yesu yindonj da, “Yete re man wingawinga ke yipyka kima, man utkunde!”

*Yesu ma Tendam Mop Yit
(Mat 13:10-17; Luk 8:9-10)*

¹⁰ I Tina yit seg ke riga wetaweta aukito, i ket Yesu Tinta na yibnonj, i yepiya re Ton kima wekenonj dide Twelp (12) itmikitijog riga gilgil b'arkita yoramito Tina tendam yit gatab. ¹¹ I Yesu mira amninonj da, “God kea ji Tina pumb tungg gatab wigawiga yit wumir akainonj wanim. Aji riga yepim re maka Ken yimta nundoki, towanim onggityam komkesa yit re wumir okateni kesa jaba tendam yit nena im wekeny. ¹² Nokim da idenat onggityam bageyam Isayamna yit ririrkip tainy da,

Yir ke yir ongong reyeninem
aji goro ton gar ke rakateninem,
i kwa yipyka ke rutkundeninem
aji goro nony raukinem,
nokim da idenat ton maka tengandanj Godim
pilwa
i dide God towaina negir mile makwa opima
awir tamnikainy.”

*Yesu ma Isipkeni Tuny Igmarka Riga ma Tendam
Yit (Mat 13:18-23; Luk 8:11-15)*

¹³ ¶ Yesu ten amninonj da, “Win onggityam tendam yit maka wumir aindam. Si odede ra, riñdede im win komkesa tendam yit wumir taukindam?” ¹⁴ Seg ket Yesu itemb tendam yit isipkena yiñenonj da, “Wala riga re tuny igmarka eyenionj, si ija emb ji. God ma wiko rigat Tina yit pitapita omneny riga wa pilind. ¹⁵ ¶ opi re ji nyawind isokto re insimemb ji riga esipkeniny ya pilwa im re bageyamit God ma yit apureniny aji ton gar idoki im wekeny. Si ra ton itemb God ma bage yit tutkunji, odenja ket Satana opimemb God ma yitkak tewaikisiny towa pilke rinsim re bageyamit apureniny towa pilwa. ¹⁶ ¶ opi re ji gimo gowind isokto re insimemb ji riga esipkeniny yepim re God ma bage yit utkundenyi dide odenja ket ton itemb yitkak sam kima yokatenyi. ¹⁷ Aji ton makaya ngor wa ap b'amka wuweny God ma onggit yitkakim pilind aji ton sobijogjog gangga nate itemb yitkak gar ke yokatenyi. Aji daka ra God ma yitkak map negir ma b'atonkena mile i bebig dide b'isadrena mile pita taukanj, ton odenja im ket sap totekanj dide ket itemb God ma yitkak irari. ¹⁸ ¶ opi re ji wanjametind isokto re insimemb ji riga esipkeniny yepim re God ma yitkak utkundenenyi, ¹⁹ aji ton gowukoi yirkokar singind ukoijog nony menamena amnikenenan, i jogjog gasa singind b'anyginena sam yokatenyi, i dide kwa ninda gowukoi gasa wa singi aukenenanj towaina garind. Si tonpimemb ji odede riga gangga kesa amnikenenanj God ma yitkak

danda kima emorkam. Si tonsimemb God ma yitkak yikangindenyi. Si onggit paemb ket maka God ma yitkak kip tijagikanj towa pilind. ²⁰ I opire ji b'ogil sal gowind isokto re insimemb ji riga esipkeniny yepim re God ma yitkak utkundenyi i gar ke utkunda ke yokatenyi, ngirpu ket kip jogjog ijagikanj, yipam pilke teti (30), yipam pilke siksti (60), i yipam pilke andred (100)."

*Lampa Uwonyitam Ororind
(Luk 8:16-18)*

²¹ I Yesu amninonj da, "Win nangga pae lampa so omnenya, minda rika kopakak ke utwangka ma o minda rika dar ke ikanginda ma? Si ringma, ma ita tina uwonyitapu pipmetind oramisyia? ²² Si Nangga im komkesa God ma pumb tungg gatab yu egiti wekeny re ngayand pitapita omnena mim ji, i dide nangga im komkesa God ma pumb tungg gatab yu utwangki wekeny re ipangenda mim ji ngayand." ²³ I yit seg re ket Yesu yindonj da, "Yete re man wingawinga ke yipya kima, man utkunde!"

²⁴ I kwa ton ten amninonj da, "Win b'ogla nonyik b'obogil b'amdeninam onggit yitkakim pilind nangga yit im re yu win utkundenindam Kor pilke! God opima wanim okawam odede yipa wiip tondon wa takatenainy rija na ra win danda ondratena iyenya gar ke utkunda ke onggityam Koina yit okatam. Si God kwa opima onggityam waina ondrateni danda ririrind wa wumir tagoniny, i ma onggit nena im aji daka Ton opima kwa onggityam waina danda tondon tumind ninda wewe wumir wa tesmurenainy. ²⁵ Mop nokip yet ra onggityam Koina yitkak wumir okateny, God

opima onggit rigam b'usaya kwa Tina yitkak gatab wumir ogoniny. Aji yet ra maka okateny, God ita awir omnaū nangga mog wumir e onggit rigat yowam.”

Tuny Igmarka, Owinka dide Erngokam Tendam Yit

²⁶ ¶ Yesu yindonj da, “God ma pumb tungg ija emb ji yipa wip rija e re wala rigat tuny egmarkiny de gou wa. ²⁷ ¶ bibir utnyita wingirind i siwiny yutunga wingirind tuny pok ikkanj i dide owinkanj. Aji wala rigat ton ma wumir e rija im tuny aukanj. ²⁸ Si gowit tilenggyam owoukip amnikiny re ija emb ji, naska nangg tawinkiny, i ingkek ket owoukip kolkak tejagikiny. Si itemb ket mogji tamnikiny owoukip kolkak borand. ²⁹ ¶ ra ket owoukip raka taukanj, odenja wala rigat ket giri okas ipkam, nokip kemb erngoka wiñ yokas.”

*Mastad Tuny ma Tendam Yit
(Mat 13:31-35; Luk 13:18-19)*

³⁰ ¶ Yesu ket yindonj da, “Ridede yit kae men isipkenyu da God ma pumb tungg ija e? Ringgityam tendam yit e men ingau? ³¹ Si ija emb ji ket it re mastad tuny itliti yibim yipa sopapu gowind ninda b'enga wip tuny kima. ¶ re ket igmarka wiñind, ton sobijogjog kip na yibim komkesa tuny wingirind onggit sopapund. ³² Aji re ket itot seg, i nangg inika yik, ngirpu ket ukoi jog nangg awik onggit sopapu wingirind. ¶ kwa ukoi bia aukanj. Si onggit wulim pilind pumbind ngenap ririr im towaina met orangka teyenanj.”

³³ I re Yesu ten auyaeninonj jogjog tendam yit ke, si rigap ririrjog na aukito tina yitkak wumir okatam. ³⁴ Si Yesu tendam yit nena kena riga amneninonj. Aji re Ton Tinta yibnonj Tina b'auyaena riga kima, Ton ket idenatemb komkesa yitkak esipkenainonj. Si omandemb ji Tina b'auyaena rigap nony aukito.

Yesu Ukoi Rib Mumakesa Yomnonj
(Mat 8:23-27; Luk 8:22-25)

³⁵ I re onggit bibirind si yimokonj, Yesu omanda gigand omiti yibnonj. I odedend ket Ton Tina b'auyaena riga amninonj da, “Sipa nata wuyin yipa tab wa.” ³⁶ Seg ton ket tina b'auyaena rigap ukoi riga bobo erarkito sipa yurund, i ket angurkito giga wa rikind re Yesu omiti yibnonj. Seg odedend ket wanakana yiawato sipand, i ninda gigap kwa kea yipand ton kima menon yokato. ³⁷ I re towaina menonind ukoi jog depu rib ikonj, dide ukoi wurop giga ipowa eyento. Si kwa kea toda giga nyi b'angjika wuwenonj. ³⁸ I Yesu giga kak wa yit na wegonj mopbu kumbind. Si Tina b'auyaena rigap Tin yit opmura yiyeno dide ket Tin yomneno da, “Ouyaena riga-wii! Man ma ita nony sowa pilind! Men momta im negir taindam.” ³⁹ I re ket Yesu utnyitonj, Ton ket rib samany yiowonj da, “Muma kesa ae!” dide sipand wuro yomnonj da, “Or seg ae!” Seg ket, depu rib re kea mumakesa awonj dide ket daka sipa nyi kea mumakesajog awonj. ⁴⁰ Seg Yesu ten amninonj da, “Nangga paim win mog aindam? Ma win makaya gar ke utkunda ke nokasya?” ⁴¹ Si ukoi mogat ten akasinonj i towalenggyam b'arkento da, “Si ride

Riga e ji? Wii, rib ake sipa wurop todaka kea Tin yit yutkunjya!”

5

Negir Wingawinga ma Okati Riga B'ogil Omna Yit (Mat 8:28-34; Luk 8:26-39)

¹ I ton ket sipa yipa tab wa wuwonj de Gerasen eriya gatab wa. ² Re Yesu giga ke opendonj, odenja yipa negir kilkil wingawinga ma okati riga gimo yiund eski gopmet ke ikonj Ti pilwa, i wiwpwip awonda Ton kima. ³ Onggit eriyand, gopmet re gimo yiund eski na wekenonj gimo dorind. Itemb ji negir wingawinga ma okati riga wimena yikenenonj onggit gopmet nata. Si makwa yipa rigat ririr na tin ijebikam kai ke o dide sein kai ke. ⁴ Rigap pop jogjogpyam pisind i dide yimind yijobikeneno kai ke dide sein kai ke. Ají ton kai epkeneninonj i sein kai anygikeneninonj i dide dea ta b'iskokeninonj ti pilke. Si makwa yipa rigat tina danda ke tin gou wa yomnonj. ⁵ I ita bibirind dide siwinyind ti menamena yokatenenonj gopmet gangga nata dide ninda sukak nata obaerena ara kima i dide tilenggyam gimo orkakorkak ke tina ji b'epkenenonj. ⁶ I re ton Yesund pajapaja yir yongonj, ton b'itkonj Yesum pilwa i kumsos b'amkonj Ti pilwa. ⁷ I dide b'okta irere kima yindonj da, “Yesu! Pumbjog Godimna B'iga! Nangga e man singi yomnyit kor pilind? God ma nyi kima metirkisin. Goro ken negir notinim!” ⁸ Nok penaemb ton odede yindenonj, nokip Yesu naska kea tin yomnonj da, “Negir wingawinga man opende onggit rigam pilke!” ⁹ Si Yesu tin yerkitonj da, “Yeté

mor nyi?" I ton mīra yomnonj da, "Kor nyi tonte Ligiyon, nokip sīn jogjog im."* ¹⁰ I ton Yesund danda kīma yitenawonj da, "Yesu! Man goro sīn neteaukeninim onggit eriya ke!"

¹¹ Onggit wīnind kea jogjog ongeni b'om bobo wekenonj dor tabind. ¹² Si onggit negir wingawingap ket Yesund yerkito da, "Sīn nitmikurine onggit b'om wa pilwa, si idenat sīn b'itgarkindam towa pilwa." ¹³ I Yesu ket ten engainonj b'igaram. Seg negir wingawinga ket opeko onggit rigam pilke, i ket b'om wa pilwa b'igarkito. Opimemb ji b'om ama rika tu tausin (2,000) na. Ton wanakana b'ikto sīpa yuru kumb wa, i ket sīpa wa unyurto, ngirpu ket komesa uj aukito. ¹⁴ Onggit kak ke ket, b'om ongena riga b'ikento dīde yīdir yīt yiyeno onggit taunind dīde ninda wuswus tungg nata. Si riga re kea opendento onggityam mile yīr ongongim rīna re aukonj. ¹⁵ Re ton wuwenonj Yesum pilwa, rigap yitabino onggit rigand yet re Ligiyon wingawinga ma okati yibnenenonj. Aji ton ket kobirgim b'ikoki dīde b'ogil nony menamena kīma na omitti yibnonj. Si riga mogna aukito. ¹⁶ I yepiya re mile towaina yīr ke yīr angto, ton riga wa pilwa yīpayipa b'obogil esipkenauto ringma na re mile aukito onggit negir wingawinga ma okati rigam pilind i dīde kwa b'om gatab. ¹⁷ I rigap Yesund danda kīma yerkito towaina eriya ke ewaikitam dīde menonim deta b'enga gatab wa. ¹⁸ I re ket Yesu giga kumb wa angitonj, i riga yet re

* **5:9:** Ligiyon re yīpa ukoi Roma geja riga bobo nyi na, i ama rika siks tausin (6,000) geja riga na.

negir wingawinga ma okati yibnonj, ton Yesund yitenawonj menonim yipand Ton kima. ¹⁹ Ají Yesu maike tin yingawonj menonim ton kima. I tin yit nena na yomnonj da, “Meke moina met wa, de moina riga wa pilwa, i dide man ket ten wumir tamninyit nangga na re Yonggyam mor momnikainy i re kwa Ton men kear mominy.” ²⁰ Si ingkek ket itemb riga yiawtonj i ket yikonj Dekapoli eriya† wa, ngirpu ton ket b'atomonj yit pitapita omnенам nangga na re Yesu ti pilind amnikinonj. Si komkesa riga yepiya re tina yit utkundeno, kea kid kesa aukito.

Yairomna Uj Ngimngai Yilo Okawam dide Kopa Kongga Isakendam

(Mat 9:18-26; Luk 8:40-56)

²¹ I Yesu b'usaya giga ke ijendonj si pa tab wa. I re Ton maka giga ke opendonj gil wa, aji kea de ukoi riga bobo Tinim yir ungawam b'eomto si pa yurund. ²² Re ket Yesu opendonj giga ke, yipa Ju riga waina yir opmitenapu met mopyam yir ipka riga ikonj Yesum pilwa, nyi da Yairo. Si re ton Yesund yir yongonj, ton ket Yesum wi bind kumsos b'amkonj. ²³ I ton odede yit kima Yesund yigekitonj menonim tina met wa da, “Koina ngimngai b'iga momta o uj okas. Ringma man koina met wa metket i yim taramisit ti pilind tin isakendam, idenat ton yilo okas?” ²⁴ Yit seg ke Yesu yiawtonj Yairo kima.

I ukoi bobo rigapiya Yesund yimta yundoko, i dide kwa Ti wusind pipmet b'isatena wuwenonj menon wingirind. ²⁵ Re towa menonind, omanda

† 5:20: Dekapoli engenda yitkak da ten taun.

ji yipa kongga wikonj towa wingirind yet re kus opekenenonj twelp (12) kemag kima. ²⁶ Itomb re kongga ton kopa awir omnam jogjog dokta wa pilwa wikenenonj, i ma sobijog gar bebig kima na b'asowa yokatenenonj dokta waina yir ipka wingirind. I dide kwa komkesa tina wulkip esomnena eyeneninonj. Aji ton makwa yipa b'ogil yokatonj, aji tina kopa re ukoijog na auka yikenenonj. ²⁷ I itomb kongga kea Yesum gatab yidir yit utkundonj, seg ton tikonj dide ket riga wa ganggand Yesum kak ke wikonj, ngirpu ton ket Yesumna kobirgim yesopayonj. ²⁸ Mop nokip ton kea tina garind windonj da, "Ra kon tina kobirgim nena esopaen, kon ita b'itisakenjin." ²⁹ I odenja tina kus opekapu yira kesa awonj, dide ton ket ji ke yipintonj da, "Ke kon b'ogil e aen kopa ke." ³⁰ Odenja Yesu todaka kea b'angwatonj da ti pilke danda re kea ewaikitonj. Si ton ket engendonj riga wa pilwa, ngirpu arkisinonj da, "Yet Koina kobirgim yesopai?" ³¹ I Tina b'auyaena rigap mira yomno da, "Yir yonge ji riga bobo! Mor wusind pipmet b'isatena wuweny. Aji nangga pae Man b'arkita yoramisit da, 'Yet Ken nesopai?'" ³² Aji Yesu yir ke oraka yiyanonj onggit rigand yet re Tin yesopayonj. ³³ Aji odenata onggit konggat mogapip kaktiti aukonj, mop nokip ton wumir na nangga na re ti pilind aukonj. Si ton wikonj Yesum pilwa, ngirpu sap otendonj i ket pitapita yomnainonj komkesa iminjog gasa rina re ti pilind auka wuwenonj. ³⁴ I Yesu onggit konggand womnonj da, "Ngimngai b'iga! Moina gar ke utkundate men misakenj. Meke ngimbla kima. Mor kopa ke

b'asowa re kemb seg ainy."

³⁵ I re Yesu onggityam yit opurenand yibnonj, odedend ket ninda riga tuwonj Yairom met ke, i dide Yairond yomno da, "Moina ngimngai b'iga kea uj ainy. Si nangga pae man ouyaena rigand jabakipind il yongket menonim? Goro Tin isakaulisit!" ³⁶ Ajì Yesu tin yit yomnenonj onggit gatab yitkak rina re bageyam rigap apurento Yairom pilwa. I Ton ket Yairond yomnonj da, "Goro moga tawim! Gar ke utkunda nena yoramite!" ³⁷ I Yesu makwa yena yingawonj tin yimta undokam aji ten nena Petro, Yakobo, dide Yakobomna yinggaan Yoan. ³⁸ I re ton Yairom met wa opento, Yesu kea yir anginonj uj riga isnawa milend rina re rigap amnikto yii kima i dide ukoi guglam kima. ³⁹ I Yesu ton b'igaronj met wingir wa, i riga amninonj da, "Nangga paim win odede guglam dide yii ainindam dikind? Itomb ngimngai b'iga re ma uj o, ajì yit o weg." ⁴⁰ Ajì rigap Yesund ngong na yengeno. Ingkek ket, Yesu ten komkesa ewaikurinonj, i dide ara emokinonj b'igam b'u ake mog dide Tina b'auyaena riga yepiya re Ton kima wuwonj. I ton ket wuwonj rikind re uj b'iga wibnonj. ⁴¹ I Yesu b'igand yimind wokatonj, i ket womnonj Aram yit[†] ke da, "*Talita kum!*" engenda yitkak noke da, "Ngimngai b'iga! Kon momnyin, utnyite!" ⁴² I odenja onggit ngimngai b'igat utnyitonj, i dide ket met wingir nata wikenonj. I ti kemag re twelp (12) na wibnainonj. Si omandemb ket riga yepiya re onggit b'igam gatab mile yir

[†] **5:41:** Yesu womnonj Aram yit ke, mop nokip onggit winind Ju riga ukoi wumir na Aram yit opurena.

yongo, ton ukojog kid kesa aukito, nokip gasa re towa liyaljog na aukonj. ⁴³ I Yesu towanim danda kima b'ingawa yit yoramitonj da, “Goro yi pat onggityam gatab yit pita yamnik!” I dide amninonj da, “Owou ti wokawa!”

6

Yesund Tinajog Najaret Tunggamip Isnawa kesa Yomno (Mat 13:53-58; Luk 4:16-30)

¹ Yesu ingkek ket yiwateronj dide yikonj Tinajog tungg Najaret wa, i Tina b'auyaena rigap kea Tin yimta yundoko. ² I re ket Ju riga waina wiram dide yir opmitena bibir awonj, Yesu ouyaena yotomonj Ju riga waina yir opmitenapu metind. I re jogjog rigap Tina yit yutkundeno, ton kea ket kid kesa aukito, ngirpu ket endento da, “Ringkaim onggit Rigat emjinonj komresa odede gasa? Yet Ti b'ogil multekip yokau? I ridede im Ton odede kid kesa kima danda wiko amnikeniny Tina yim ke? ³ Ma itemb riga met oranga riga e, i Mariyam b'iga e, i dide Yakobo, Yose, Yudas dide Simon towa nany e? Ma ma Tina ngimirwar indamima men kima?” Si ingkenaemb ket rigap Yesund isnawa kesa yomneno. ⁴ Seg ket Yesu ten amninonj da, “Rigap Godimna bageyam ita yisnaenenyi komresa gatab nata, aji tinajog tungg rigap ma ita tin yisnaenenyi. I kwa daka tinajog kus ke rigawarip dide tina metamjog rigap ma ita yisnaenenyi.” ⁵ Si Ton ma ririr na kid kesa kima danda wiko omnikam de Tinajog tunggind. Si Ton ninda kopa riga wa pilwa nena na yim aramiteninonj dide esakenjinon. ⁶ Aji maka gar ke utkunda ke Yesund yokato, si

onggit penaemb Yesu ma sobijog na nonysipsip aukonj. Seg ket Ton yikenonj ninda wuswus tungg nata i ket riga ouyaena eyeninonj.

*Twelp (12) Itmikitijog Riga Itmikitam
(Mat 10:1, 5-15; Luk 9:1-6)*

⁷ Yesu Tina Twelp (12) b'auyaena riga ara emokionj b'eomam, i Ton ket ukoi juwai akainonj negir kilkil wingawinga eaukenam. Seg Ton ket yotomonj ten itmikenam nimog nimog ninda tungg wa. ⁸ Si Yesu yimta kena ten etmikeninonj, aji naska Ton ten yit amneninonj da, “Goro kwa odede nanggamog gasa na eyinam wa menonim, opi re sana, ga o wulkip ga, aji kutip nena na. ⁹ I kwa win b'ogil im b'itkokindam yonginkak dide yipaina kobirgim.” ¹⁰ I kwa Ton ten amninonj da, “Ra win tuwenyit tungg yipayipa nata, rigap opima wen yipayipa met nata obai tamnenanj waina menon tungg wingirind. Si win omanda tekenyit ngirpu ra win opimemb tungg terarenindam dem. ¹¹ I ra maka ra yipa tunggit simesime wen taminy i dide rigap maka ra waina yit tutkundanj, si win idenatemb ket onggit taun ke iwasya. I onggit iwata winind win b'ogla waina pispamind sungar tedbenenindam towanim nony aukam da towaina negir mile b'isagikam win ita ik dem.” I re yit omnena seg awonj, Ton ket nimognimog etmikeninonj. ¹² Si Twelp (12) itmikitijog rigap menon yokateno, ngirpu yitkak pitapita amnento da, “Win waina negir mile ke engenjinam de Godim pilwa!” ¹³ I kwa ton ket jogjog negir wingawinga eaukena eyento, dide jogjog kopa riga gaya ke isnika eyento i ten isagika eyento.

*Baptiso Yoanimna Uj gatab Yit
(Mat 14:1-12; Luk 9:7-9)*

¹⁴ I king Erod* daka kea yīdir yit utkundonj Yesum gatab. Mop nokip Yesu ma nyī re kea pitakipind awonj dide rigap Yesum gatab b'engabenga wīp ke yit apurento. Si ninda rigap yopureno da, "Baptiso Yoan kea uj ke utnyitonj. Si onggit mop paemb Yoanimna kid kesa kima dandate wiko omnika iyeny itemb riga Yesum pilind." ¹⁵ I ninda rigap yopureno da, "Ton Eliyate." I kwa ninda rigap da, "Ton God ma bageyam e odede wīp it re yipa kesam bageyam re dide yet re kesam peba wīnind yibnonj." ¹⁶ Aj̄i re Erod onggityam yīdir yit utkundonj, ton yindonj da, "Yoante utnyitonj yena re kon mop yīpendond." ¹⁷⁻¹⁸ Si itemb ji yīt rija na re Erod Baptiso Yoanind mop yīpendonj. Si re king Erod ti yingga Pilipimna kongga Erodiyand wokatonj ti konggam, si Yoan king Erodind yomnenonj da, "Itemb re ma b'ogil mile emb ji, man itomb mor yinggaim kongga mor konggam womnyit." Si onggit penaemb ket king Erod Yoanind yīmīnd yusunatonj dide yijobikonj i ket sibibmet wa yoramitonj ti kongga Erodiyand nony b'ogil omnam. ¹⁹ Aj̄i Erodiya re ma sobijog na Yoanim pilwa solo aukenenonj, ngirpu singi awonj tin ongandam. Aj̄i ma ririr na awonj. ²⁰ Mop nokip Erodit tin yowaendenonj riga wa pilke. Si nangga pena Erod Yoanind yowaendenonj, nokip ton kea wumir awonj da Yoan re negir

* **6:14:** Dikind king Erod re Erod Antipate yete re ukoyam king Erodimna b'īga. Ton ti b'uim pilke akatonj Galili eriya dide Peraya eriya wīp iyoyim.

kesa dimdijog riga na i dide kwa ton yina omni
 riga na, si onggit penaemb ton Yoanind mogna na
 yuwadonj. I kwa nok penaemb da ita winind
 re ton Yoanimna yit utkundenenonj, ton tina
 yit b'obogil gar sam kima na utkundenenonj,
 nangga ma ji rada ton ma sobijog na nony bebig
 aukenenonj yit utkundand. ²¹ Ajie kea yipa b'ogil
 wiñ awonj Erodiyam. Re Erodimna ukendi bibir
 yokatonj, Erod komresa tina gabmani ukoi wiñ
 riga i ninda wan tausin (1,000) geja riga mopyam i
 dide Galili eriya wingirind ninda ukojog nyi riga,
 towanim ukoi diyamdiyam mile yomnikonj. ²² I
 kea dikind diyamdiyampu pipmetind Erodiyam
 ngimngai b'iga tikonj, i ton ket ger omaronj. I
 tina ger omarkat Erod dide tina ingauki riga ukoi
 sam amninanonj. Si king Erod onggit ngimngayind
 womnonj da, “Nigekite nangga ma man singi
 aet! I kon ita motkaen.” ²³ I dide ton tin God
 ma nyi kima womnonj da, “Nangga mana ra man
 netirkisit kon ita motkaen. Ra man singi taet koina
 kantri inyinyind okangendi yipa tab, si kon ita
 motkaen.” ²⁴ I ngimngai ton ket bau wa opendonj
 i wikonj ti mogim pilwa, ngirpu windonj da,
 “Nangga ma kon b'arkita oramisin?” I ket ti mog
 mira womnonj da, “Baptiso Yoanimna moptekip
 mana erkisit.” ²⁵ I odenja ton ket wanakana
 wingir wa b'igaronj, i king Erodind yerkitonj da,
 “Kon singi da man otadejog Baptiso Yoanimna
 moptekip notkaet pletond.” ²⁶ Seg, king Erod
 ma sobijog na gar bebig awonj, ajie ton ma ririr
 na awonj ngimngai ma b'arkita b'isayam, nokip
 ton kea God ma nyi kima okawam womnonj
 komresa ingauki riga wa wipind. ²⁷ Si odenja

king Erod ara yemokonj yipa tina yir ipka geja riga, i yingawonj Yoanimna moptekip iyoyim. Re ket geja riga yiwatonj sibibmet wa, ton kea ket Yoanind mop yipendonj. ²⁸ Seg ket ton Yoanimna moptekip iyonj Erodim pilwa pleto kumbind. I Erod ket itomb ngimngai b'igam wokawonj. I ngimngayit daka ket yiyonj ti mog Erodiyam pilwa, i ti wokawonj. ²⁹ I re Yoanimna b'auyaena rigap onggit gatab yit utkundo, ton ket wuwonj, i Yoanimna ujgim yurowato, i dide yipa gimo yiund eski gopmet wa yoramito. Si ija emb ji Yoanimna mop ipendi yit.

*Yesu Paib Tausin (5,000) Riga Angeninonj
(Mat 14:13-21; Luk 9:10-17; Yoan 6:1-14)*

³⁰ I itmikitijog riga rina re Yesu etmikeninonj tungg yipayipa wa, ton itekto Yesum pilwa dide yipand b'eomkurto. I ket Yesund wumir yomneno komkesa gasa rina re ton amnikto dide auyaento. ³¹ Onggit winind ma yipa kima riga na wuwenonj dide itendento. Si onggit penaemb Yesu dide Tina b'auyaena riga diyam awowim gangga kesa na wekenonj. Si onggit penaemb Yesu Tina b'auyaena riga amninonj da, "Wuyin menta de wul kesa tungg wa, i win sobijog wiram yokata!" ³² Seg ket Yesu dide Tina b'auyaena riga gigand yiwato, i wuwonj de wul kesa tungg wa. ³³ Aji re ton menon yokato, jogjog rigap kea ten yir angto. Si re ton yongwato pipmet ritade re ta ton menon yokato, rigata rigata yipand b'ikento komkesa wuswus taun ke i ton naska opendento de onggit riga kesa tungg wa. ³⁴ I re Yesu giga ke opendonj, Ton kea ukoi riga bobo yir anginonj. I Ton ten

gar ke kear amninonj, mop nokip ton wekenonj re odede wip na ringmim ra mamoi tekeny yir ipka riga kesa. Si ton ket ouyaena yotomonj dide ma yipa kima yitkak na ouyaena eyeninonj. ³⁵ I re ket bibir win awir auka yikonj, Tina b'auyaena riga tuwonj Ti pilwa dide ket Tin yomno da, “Itemb tungg re riga kesa tungg e, i kwa bibir win re kea awir auka yik. ³⁶ Si riga wetaweta amnikine, i etmikenine wuswus sopapu tungg nata dide wuswus tungg nata. Si ton wou dide towalenggyam owou remjinem towanim owowim.” ³⁷ Aji Yesu ten mira amninonj da, “Win towa owou agoninam!” Si ton Yesund yomno da, “Ridede e sin omniku? Si ringma, sin wuyin i wan tausin tu andred (1,200) Kina† ke owou temjindam dor i dide tagonindam dor towa owowim? Ma ririr e.” ³⁸ Aji Yesu ton amninonj da, “Leamog sana nganja im win awamindam? Wuwe i mabe yir angina!” Si re ton adarkito, endento da, “Insima paib (5) sana nganja dide nimog kabum nena.” ³⁹ I Yesu Tina b'auyaena riga engainonj da, “Riga engainam bobobobo aukam dide tib kumbind omnikam! Komkesa opima diyam taukanj.” ⁴⁰ Seg, riga bobobobo omnika wuwenonj, ninda re picti (50) riga bobo i ninda re andred (100) riga bobo. ⁴¹ I ket Yesu paib (5) sana nganja dide nimog kabum akasinonj, i pumb wa yir yikenonj dide ket Godind siteket yit yomnonj. Ngirpu sana nganja epkikinonj i ket Tina b'auyaena riga wa pilwa agoninonj riga wa yingg iyenam. I dide kwa nimog

† **6:37:** Grik peband da “tu andred (200) Denari”. I onggit winind yipa Denari wulkip re yipa riga ma yipa bibir wiko mira na.

kabum ipka eyenonj towanim yingg iyenam. ⁴² I ton komkesa riga diyam auto dide kea ngor aukito. ⁴³ Seg ket b'auyaena rigap riga wa pilke sana komb dide kabum komb akatto dide aramkito watind, ngirpu twelp (12) wat yindangir aukito. ⁴⁴ Si komkesa yepiya re rigajog diyam aukito re paib tausin (5,000) na.

Yesu Nyi Tumind Yikonj
(Mat 14:22-33; Yoan 6:15-21)

⁴⁵ Seg ket odenja Yesu Tina b'auyaena riga engainonj giga wa angurkam dide naskanaska menonim sipa yipa tab wa de Betsaida wa. I onggit ganggand re Tina b'auyaena rigap giga wa angurkito menonim tab wa, Yesu ket Tilenggyam riga wetaweta amnikinonj. ⁴⁶ I Yesu riga wetaweta amnikinonj, seg Ton ket yiwateronj yipa sukak wa yir opmitam. ⁴⁷ I re si giep awonj, giga re sipa inyiny nat yibnonj, aji Yesu re Tinta na yibnonj gil wa. ⁴⁸ I Yesumna b'auyaena rigap bebig na yir yongo karab ingaena wingirind, mop nokip rib yikenonj re towa wipwip na. Re Yesu towaina bebig yir yongonj ispara momtand, siwiny tri (3) i siks (6) kilok ganggand, Ton pis nya towa pilwa yikonj sipa nyi tumind dide ton singi na awonj ten igoukitam. ⁴⁹ Aji re ton b'auyaena rigap Yesund yir yongo menonind sipa nyi tumind, ton ija na nony auto da kobir e. Si ton kea b'okta irere aukito. ⁵⁰ I komkesa rigap Tin yir yongo dide mogaya yuwado. Si odenja Yesu ten amninonj da, “Kid seo ainam! Konten, goro mogaya tainam!” ⁵¹ I re Yesu ket ton kima angitonj giga kumb wa, si rib daka kea ket mumakesa awonj. Si ket b'auyaena rigap nony

menamena kesa ukoi kid kesa aukito. ⁵² Mop nokip ton maike nony aukito jogjog riga wa sana ogona gatab, i towaina ipindena nony ke kutjog na aukonj.

Genesaret Tunggind Yesu Kopa Riga Esakenjinonj

(Mat 14:34-36)

⁵³ Seg ton ket sipta ijendo de Genesaret gil wa, i ton ket giga yoramito. ⁵⁴ Re ton giga ke opektu, odenja rigap ket Yesund yongwato. ⁵⁵ Re rigap utkundeno rikind re Yesu yikenonj, ton wumir omnena b'ikento komresa tungg nata onggit eriya wingirind, i ket negir kopa kima riga titind eyento Ti pilwa. ⁵⁶ I rikind re Yesu yikenonj tungg nata i taun nata i dide sobijog tungg nata, rigap kopa riga eyento dide aramkito maketind. I ton ket Yesund erkena yiye, nokim da idenat kopa rigap Tina kobirgin petir esopaya iyenyi. I komresa riga yepiya re yesopayo, ton kea ket b'ogil aukito.

7

Ju Riga Waina Kesam Dad ke B'isateni Mile

(Mat 15:1-9)

¹ I Parisai riga dide ninda Ju riga waina gog ouyaena riga yepiya re tuwonj Yerusalem taun ke, ton b'eomkurto Yesum pilwa. ² I ton ket ninda Yesumna b'auyaena riga yir angto towaina iseka mile kesa kil kima yim ke diyam awowind. ³ (Parisai riga dide komresa Ju rigap towaina dad ke b'isateni mile ninda owama eyento. Ija emb ji iseka gog mile, ra riga maka ra yim b'obogil b'itisekanj, ton ma opima diyam taukanj. ⁴ I

kwa ra ton maketpu ke tui i ra ton maka ra nyi
ke b'iseka mile tamnikanj, ton ma opima diyam
taukanj. I dide ton kwa kea jogjog gog mile
towa dadwar wa pilke owamam emdito. Si yipa
mile itemb ji kapo, sospen dide ketel* iseka mile.)

5 Si Parisai riga dide Ju riga waina gog ouyaena
rigap Yesund yerkito da, “Nangga mop paim
Moina b'auyaena rigap maka wimena wuweny
elda riga waina dad ke b'isateni mile ririrind, aji
ton iseka mile kesa kil kima yim kaim diyam awou
wuweny?” **6** I Yesu ket mira amninanj da, “God
ma bageyam Isaya iminjog na b'ogil bage yit yop-
ulitonj waina gim ke b'ogil aji ngor wa negir mile
gatab. Ija emb ji tina peband iriki yibim da,

‘Onggit rigap Ken nisnaenenyi towaina tugim
nena kae,
aji towaina nony menamena re ma wus nasim
Kor pilke wekeny.

7 I ra ton God ma yit tauyaenenanj,
ton rigaina omniki gog kaim riga auyaene-
nanj.

Si onggit paemb ton jabakipind nony kesa
kana im dide mogji kesa im Kor pilwa yir
opmitenenanj.’

8 Si win odede yipa wi nya kaim God ma b'ingawa
yit awaikenindam, aji win riga waina dad wa pilke
b'isateni mile im owama eyenindam.” **9** I kwa
Ton ten amninanj da, “Win God ma b'ingawa yit
b'obogil im esaenenindam, nokim da idenat win
waina dad ke b'isateni mile nena tamorkenenin-
dam. **10** I Mose gog peband yindonj da, ‘Mor b'u

* **7:4:** Ninda Grik peband daka kwa [wungapu kasal].

ake mor mog esnae,’ i kwa yindonj da, ‘Yet ra b'uim pilwa o mogim pilwa negir yit opulis, ton ita iminjog uj ondriki ibim.’ ¹¹ Ajı win ija imemb ji riga ouyaena eyenindam da, ‘Ra yipa rigat ti b'uim pilwa o ti mogim pilwa indeny da “Korban,” isipkita yitkak da, “Itemb re Godim pilwa singi si gasam oramiti e”, si ton ma ririr e onggityam gasa ti b'uim o ti mogim okawam.’ ¹² Si win onggityam ouyaena ke komkesa nya im edokindam ti b'uim o ti mogim yim okawam. ¹³ Si win onggit wa b'uar wa pilke b'isateni yitkak e b'obogil yemorkenenya, i ingkaemb God ma yit awir amnikindam. I win kwa jogjog im odede yipa wip gasa amnikindam.”

*Ju Riga Waina Kesam Dad ke Iseka Mile
(Mat 15:10-20)*

¹⁴ I seg ket Yesu b'usaya opimemb riga bobo ara emokinonj dide ten amninonj da, “Win komkesa Ken nutkunda, i wumir yokata! ¹⁵ Makwa ita yipa gasat rigand kil kima omny rinte re bau ke yik rigam kom bora wa. Ajı gasa rinte re rigam kom bora ke opek, si tontemb ji onggit rigand kil kima yomnik. ¹⁶ Yete re man wingawinga ke yipya kima, man utkunde!” ¹⁷ Seg, re ket Yesu riga wa pilke yiwatonj i dide b'igaronj met wa, tina b'auyaena rigap tin ket yerkito onggit tendam yit gatab. ¹⁸ I Yesu ten mira amninonj da, “Ma, widaka wumir kesa im wekenyit odede opi re ton re dide? Win ma wumir im da komkesa gasa rinte re bau ke yik de rigam kom bora wa, ton ma ririr e tin kil kima omnik. ¹⁹ Mop nokip owou rinte re b'igarak rigam kom bora wa, ton ma kid wa e yik ajı kom bora wa e, i ket opek de sobijog

met wa b'iskokam." Onggit yit kima Yesu pitapita yomnonj da, "Komkesa owou dide b'angga re ma kil kima im, komkesa re owou mim dide ongong mim, ma gog kima im." ²⁰ Aji Yesu kwa yindonj da, "Gasa rinte re rigam pilke opek, tontemb ji onggit rigand kil kima yomnik. ²¹ Si gasa rinsim re rigaina kukip ke opekanj, ton rigaina kid kaim opekanj. Si odede b'engabenga negirjog nonyik b'amdena im wuweny, opi re negir b'iyena mile, yurowam mile, onganda mile, ²² gigir dide yigyg b'iyena mile, yipa riga ma gasa nony ke iponena mile, b'engabenga wip negir mile omnika singi, b'anyginena mile, b'ogil mile negir omnika mile, yir muga b'uwada mile, b'ugaga mile, b'asourena mile, i dide nony kesa omnika mile. ²³ Si opimemb komkesa negirjog gasa opekanj re riga waina kukip kaim, i tonpimemb ket rigand kil kima yomnikenenyi."

*Yipa Siropoinikisa Kongga ma Gar ke Utkunda
(Mat 15:21-28)*

²⁴ I ingkek ket Yesu utnyitonj, yiwateronj dide yikonj ket Tiro eriya wa. I re Ton yipa met wa b'igaronj, Ton ma singi na rigap wumir okasi da ama de Ton onggit met wa yibim. Aji Ton ma ririr na wigawiga egiti wiemenam. ²⁵ Odenja yipa kongga yaina ngimngai b'iga na re negir wingawinga ma okati wi'bnonj, ton kea Yesumna danda gatab yidir utkundonj. Si ton ket tikonj Yesum pilwa, ngirpu sap otendonj Tina pis wipind. ²⁶ Aji itomb kongga re Grik yitam na, i Siropoinikisa kongga na. Si ton ma Ju kongga na. I ket ton Yesund yitenawonj negir wingawinga

eaukenam tina ngimngai b'igam pilke. ²⁷ Aji Yesu tin mira womnonj da, “Naska b'iga ngor rainem, nokip itemb ma b'ogil mile e b'iga waina owou isatam dide yongg wa b'iskokam.”† ²⁸ I kwa konggat Yesund mira yomnonj da, “Iminjog e, Yonggyam! Aji kasa wusind yonggip toda b'iga waina sobijogsobijog sana kib awenenanj rinsim re b'igap b'iskokanj.” ²⁹ I kwa Yesu tin womnonj da, “Kea man gar ke utkunda ke b'ogil mira nomnyit. Si man meke moina met wa! Ke negir wingawinga moina ngimngai b'igam pilke b'ikeyn.” ³⁰ Re ket seg, ton wikonj tina met wa, i ton ti b'igand wodaronj yutungi dar kumbind, i ton kea wumir awonj da ke negir wingawinga b'ikeyn.

Yesu Yipyä Dumdum dide Yit kesa Riga Yisakendonj

³¹ I Yesu b'usaya Tiro eriya ke yiwateronj, i yikenonj Sidon nata i Dekapoli eriya tunkip nata, ngirpu opendonj de Galili sipa wa. ³² I ninda rigap yipa yipyä dumdum dide yit kesa riga iyo Yesum pilwa, i Yesund yitenawo da, “Be ngai Man yim aramite ti pilind tin isakendam!” ³³ I Yesu onggit rigand yokatonj riga bobo wingirind, i ket yiyonj dea ta tintawar wa. I Yesu ket Tina yimkak aramisinonj tina yipyand. I re auya itmanda seg, tina weyat yesopayonj. ³⁴ Seg Yesu pumb wa yir yikenonj yir opmitam, i Ton ket gar kopa kima nonya unggulitonj i dide ket ti pilwa yit yopulitonj da, “Epata,” engenda yitkak da, “Or epangenda!”

† **7:27:** Onggit winind Ju rigap God ma obagiki kesa riga gatab yit amnikenento da, “Win ma Abraam ma b'iga im aji win ija im ji kil kima yongg re dide.”

³⁵ I odenja onggit riga ma yipyä mop epangendonda i tina weyat b'inkitipu kea gorogoro awonj, si ton ket dimdim yit apureninonj. ³⁶ I Yesu riga engainonj da, “Goro kwa yena wumir tamninam onggit gatab.” Aji re Yesu danda kima jogjogpyam engaeninonj iswangam, rigap toda isanikesa jabajaba danda kima onggit gatab wumirwumir yit usenena yiyo. Si ton kea b'iklawa yiyo onggit gatab. ³⁷ Seg re rigap utkundeno onggityam yit, ton ma sobijog na kid kesa aena wuwenonj dide ket endento da, “Ton kea komkesa gasa b'ogil amnikiny, yipyä dumdum riga utkundam i yit kesa riga opurenam.”

8

Yesu Powa Tausin (4,000) Riga Angeninonj (Mat 15:32-39)

¹ Re onggit ninda bibir ganggand b'usaya ukoi riga bobo wekenonj Yesu ma yit utkundam, aji towa makwa nangga na owowim ebnainonj. Si Yesu Tina b'auyaena riga ara emokinonj dide ket ten amninanonj da, ² “Kon riga bobo im kear amninyin, nokip ke nowa bibir im Kon kima wekeny, si kea towa awir im kwa nanggamog im owowim ebnainy. ³ I ra Kon ten tetmikeninyin owoupa kima towa met wa, ke nyawind owoupat kak ijga reyenin, nokip towa wingirind ninda riga ma wuswus tungg kaim tuwonj.” ⁴ I Tina b'auyaena rigap mira yomno da, “Men dikind riga kesa tungg nasim wekenyin. Si ringkaim sin odede ukoi owou okasu dikind? Men ma ririr im onggityam riga ongenam dikind.” ⁵ I Yesu ket ten arkinsinonj da, “Leamog sana nganja

im win awamindam?” I ton mira yomno da, “Seben (7) nganja im.” ⁶ I Yesu riga engainonj omitam gowind, i Ton ket seben (7) sana nganja akasinonj dide Godind siteket yit yomnonj, ngirpu epkikinonj dide Tina b'auyaena riga wa agoninonj riga wa yingg iyenam. I ket b'auyaena rigap riga bobo wa yingg eyenauto. ⁷ Dide kwa kea towa ninda sobijog kabum ebnainonj. I Yesu opimemb kabum daka akasinonj, i ket Godind siteket yit yomnonj, ngirpu ket kwa Tina b'auyaena riga amninonj riga wa yingg iyenam. ⁸ Si rigap auto dide ton kea ket ngor aukito. Seg re b'auyaena rigap riga wa pilke sana komb dide kabum komb akatto dide ga wa aramkito, si seben (7) ukoi ga na komb owou yindangir aukito. ⁹ I Komresa riga yepiya re wekenonj re powa tausin (4,000) na. I re ton diyam seg aukito, Yesu ket riga wetaweta amnikinonj towaina tungg wa menamenam. ¹⁰ Seg re ket odenja Yesu giga yokatonj Tina b'auyaena riga kima, ngirpu yikonj de Dalmanuta eriya wa.

*Parisai Riga Waina B'arkita Kid kesa kima
Danda Wiiko Gatab
(Mat 16:1-4)*

¹¹ I Parisai riga tuwonj Yesum pilwa dide Yesu kima yit b'ugwatento, nokip ton singi na yit ke Yesund gou wa omnam. Si ton odede b'arkita kima Yesund yotonkeno da, “Man kid kesa kima danda wiiko yomnike! I ingkaemb sin motingwasu da Moina danda yikeny re Godim pilkae.” ¹² Si Yesu gar bebig kima ukoi kana nonya unggulitonj, i yindonj da, “Nangga pae rigap yepim re yu wekeny

onggit gowukoyind, ton Ken oraka niyenyi Koina kid kesa kima danda wiko yir ongongim? Kon iminjog wanim nitinjin da Kon makwa ita yipa kid kesa kima danda wiko tamnikaen towanim yepim re yu wekeny onggit gowukoyind.” ¹³ I ket Yesu Parisai riga wa pilke yiwateronj dide b'usaya giga yokato Tina b'auyaena riga kima, ngirpu ket yiwatero de sipta tab wa.

*Parisai Riga dide Erod Towaina Yist
(Mat 16:5-12)*

¹⁴ I b'auyaena rigap nony b'edatkurto ninda owou iyoyim, aji ina yipaina owou nena ebnawonj gigand. ¹⁵ I Yesu ten nonony amninanonj da, “Win nony kima tekenyit! Dide win yir kima tekenyit Parisai riga ake Erod towaina yist!”* Yesu ton Parisai riga dide Erod towaina negir ouyaena gatab na tendam yit ke yengendonj da ija emb ji ringma re yistit wiko yomnik plawa wingirind. Si onggit penaemb Yesu odede yit yopulitonj. ¹⁶ Aji b'auyaena rigap maka wumir aukito Yesu ma yit mop, si ton towalenggyam b'arkena wuwenonj da, “Ton nok pae odede yinj, nokip mera owou awir im.” ¹⁷ Si Yesu kea towaina b'arkena gatab wumir awonj, i ket ten amninanonj da, “Nangga mim win b'arkena wuwenyit da wa owou awir im? Makaya win wumir aindam i makaya win nony aukindam nangga ma Kon nindeniyin? Ringma, waina nony menamena kut im?” ¹⁸ Win yirkip kima im, aji nangga paim win maka yir angindam? I win yipya kima im, aji nangga paim win

* **8:15:** Yist re plawa inika gasa e. Si rigap yist yoramitenenyi re bred ogna ma.

maka utkundenindam? Rika win opima nonyind owama eyenindam? ¹⁹ Si re Kon paib (5) sana nganja ke paib tausin (5,000) riga angeninond, si win owou komb ke leamog wat na yindangir akattondam?” Ton mira yomno da, “Twelp (12) wat na.” ²⁰ I Yesu b'usaya ten arkisinonj da, “I kwa re Kon sana ke powa tausin (4,000) riga angeninond, si win owou komb ke leamog ukoi ga na yindangir akattondam?” I ton kwa mira yomno da, “Seben (7) ukoi ga na.” ²¹ Seg Yesu kwa tina b'auyaena riga amninanonj da, “Rika win makaima nony aukindam nangga ma Kon nindeniyin?”

Yirdidi Riga B'ogil Omnam Betsaidand

²² I re ton Betsaida wa opektu, rigap ket yi'pa yirdidi riga Yesum pilwa yiyo ngirpu Yesund yijeneno da, “Be ngai Man tin yesopae yir ipangendam!” ²³ Seg Yesu ket yirdidi rigand yim otuna yiyonj dea ta tungg bau wa, i ket auya yitmandonj tina yirkip wa dide ket yim yoramitonj ti pilind. Seg re ket Yesu tin yerkitonj da, “Wii, opima man nangga im yir anginyit?” ²⁴ I re ton yirdidi riga yir yikenonj, ton ket Yesund mira yomnonj da, “Kon riga im yir anginyin, aji ton ija im wip wuweny da wul im.” ²⁵ Tina yit seg ke ket Yesu b'usaya yim yoramitonj yirdidi riga ma yir kipind, i idenatemb ket tina nimog yirkip epangendonda. Si ton ket komkesa gasa pita kipind yir anginonj. ²⁶ Seg ket Yesu tin yitmikitonj tina met wa odede yit kima da, “Goro tungg wingir wa mekim!”

*Petro ma Pitapita Omni Yit Yesum Gatab
(Mat 16:13-20; Luk 9:18-21)*

²⁷ ¶ Yesu dide Tina b'auyaena riga wuwenonj ninda tungg nata Kaisareya Pilipo eriya wingirind. Nyawind Yesu Tina b'auyaena riga arkisinonj da, “Yena rigap nomnikenenyi da yeten Kon?” ²⁸ Si ton mira yomno da, “Ninda rigap endenenanj da Man Baptiso Yoantet, i nindap da Man Eliyatet, i kwa nindap da yipa God ma bageyamtet kesam God ma yina peba wingirind.” ²⁹ ¶ Yesu ten kwa arkisinonj da, “Aji widaka ringmim, win yena yomnikenenya da yeten Kon?” Petro mira yomnonj da, “Man re Kerisotet yena re God gaya ke yeaukonj Tina wiko omnikam.” ³⁰ ¶ Yesu ten engainonj da, “Goro yena riga wumir omna kor gatab.”

Yesu Tina Uj dide Utnyita Gatab Yit Pitapita Amninanjon

(Mat 16:21-28; Luk 9:22-27)

³¹ ¶ ket Yesu ouyaena yotomonj Tina b'auyaena riga wa pilwa da, “Rigamna B'iga b'ogla jogjog b'idgotnena takateniny. Si Ju riga waina elda riga, i yina mopyam si riga, i dide Ju riga waina gog ouyaena rigap Tin ita isayi dem, ngirpu Tin onganji dem. ¶ nowam bibirind Ton ita uj ke tutnyis dem.” ³² ¶ re Yesu onggityam yit pitapita amneninonj, Petro ket Yesund wip yowarkitonj dide ket danda kima yit yomnonj da, “Goro odede yit apureninyit.” ³³ Aji re Yesu b'engendonj Tina b'auyaena riga wa wip wa, i Ton ket Petrond samany yiyowonj da, “Satana! Man ewaikite Kor pilke! Mop nokip man ma ita nonyik b'amdena mekenyit Godimna singi mile omnikam aji man rigaina singi mile omnika ma.” ³⁴ ¶ ket Yesu

riga bobo ara emokinonj Tina b'auyaena riga kima, dide ten amninonj da, "Ra man yipa rigat singi taet Ken yimta undokam, man b'ogla naska moina singi komkesa terarkinyit, i kwa man b'ogla komkesa bebig takasinyit Godim wikkond ngirpu moina uj wul b'agbagind, dide ket Ken yimta nutundoket. ³⁵ Mop nokip yet ra tilenggyam tina yirkokar yiggong omnika iyeny, ton ita tina onggityam yirkokar dadal edamkis dem. I daka yet ra tina yirkokar edamkis Kor map dide God ma b'ogil yirkokar bage yit map, ton ita tina onggityam yirkokar okas dem. ³⁶ I ra man komkesa gowukoi mornim okasit i dide onggit gowukoi map moina yirkokar b'etidamkis dem, si nangga b'ogil e man yir onget onggit gowukoi okati ke? ³⁷ Nangga gasa kima e man ririr e igerkenyit moina yirkokar? ³⁸ I yet ra man moina gar ke Ken dide Koina yit ingar kima takasinyit riga wa wingirind yepim re yu negirjog mile i gigir dide yigiyig b'iyena mile kima wekeny onggit gowukoyind, si Rigamma B'iga Toda mornim ingar kima e motkas dem, ra Ton yina aneru kima ik dem Ti B'u ma b'ogil inyomarenand."

9

¹ I Yesu ten amninonj da, "Kon iminjog wen tamninyin da yepim re win owinki wekenyit dikind, wa wingirind ninda rigap makwa opima uj taukanj, ngirpu ra ton yir ongi dem God ma pumb tungg rinte ra ik Godimna wip omnena danda kima."

*Yesu ma B'enga Wip Inyomarena Yipa Dorind
(Mat 17:1-13; Luk 9:28-36)*

² I siks (6) bibir kak ke Yesu ara emokinonj Petro, Yakobo, dide Yoan, i ten nena eyinonj de yipa ukoi dor kumb wa. Re ket tentawar wa opekto, Yesu b'enga wip aukonj towa wipind. ³ I Tina kobirgim engendonj re bilbiljog na. Si gowukoi kobirgim iseka riga ma ririr e odede bilbiljog tamnikanj towaina bilbil omnika iseka gasa ke. ⁴ I ket Eliya ake Mose kea b'auyaena riga wa wipind pita awonda i ket ton Yesu kima yitnono aenonda. ⁵ Seg re ket Petro Yesund yomnonj da, "Ouyaena Riga! Sin otomanti im wekenyin dikind. Si sin nowa wungapu plaimet raranginum, yipa Mornim, yipa Mosem, i dide yipa Eliyam." ⁶ Petro maka nony awonj nangga mana ton Yesund yomnonj. Mop nokip ton, nowa riga ma sobijog moga kima na wekenonj. Onggit penaemb ji ton nony kesa odede yit yopulitonj. ⁷ I onggit winind rimit ten ekangjinjonj, dide ket ara ikonj rim bora ke odede da, "Itemb ji Koina B'iga yena re Kon singi yiyyenin. Si win Tin yutkunda!" ⁸ I re b'auyaena rigap towa nonony kesand yir itaingento, ton makwa yena yir angto aji Yesu nenata ton kima yibnonj.

⁹ Seg re ton dor kumb ke etaeta tuwonj de paga wa, nyawind Yesu b'auyaena riga engainonj da, "Goro yena riga wumir tamneninam nangga gasa na re win yir angindam, ngirpu ra Rigamna B'iga tutnyis dem uj ke!" ¹⁰ Si re ton Yesu ma yit gar ke yokateno owamam, towa wingirind kea ton b'arkena wuwenonj da, "Nangga mog e ji itemb yitkak uj ke utnyita?" ¹¹ Seg ton ket Yesund yerkito da, "Si nangga pae meraina gog ouyaena rigap apurenanj da Eliya b'ogla naska menon okas, i

ti kak ke ket Keriso ik dem?” ¹² I Yesu ket ten mira amninanj da, “Si yena pebat yindeniy da Eliya ita naska ik dide ton ket komkesa gasa b'obogil tangonjeniny. Ají nangga pae kwa yina peband Rigamna B'iga gatab odede iriki yibim da Ton b'ogla jogjog b'idgotnena takasiny dem i dide rigap Tin irinena kima b'isaya iyenyi dem? ¹³ Ají Kon wen tamninyin da Eliya re ke ikonj, ají ninda negir rigap kea towaina singi ririrind komkesa negir mile ti yomnikauto, odede ringmim re yina peband iriki wekeny ti gatab.”

*Yesu Negir Wingawinga Yewaikitonj Yipa Kewar
B'igam pilke*

(Mat 17:14-21; Luk 9:37-43a)

¹⁴ I re ton itekto ninda b'auyaena riga wa pilwa, ton kea yir angto ukoi riga bobo. I riga bobop re b'auyaena riga iwatinti na awamto. I Ju riga waina gog ouyaena rigap yit b'ugwatento ninda b'auyaena riga kima. ¹⁵ I re komkesa riga bobop Yesund yir yongo, odenja ton ket ma sobijog sam kima na kid kesa aukito, i b'ikento Ti pilwa dide simesime yomneno. ¹⁶ I Yesu ket ten arkisinonj da, “Nangga gatab mim win ton kima yit b'ugwatenindam?” ¹⁷ I riga bobo wingirind yipa rigat mira yomnonj da, “Ouyaena riga-wii! Negir wingawingate koina b'igand okati yowameneny dide onggit negir wingawingate tin yit kesa yomnikeneny. Si kon mor pilwa iyin re b'ogil omna ma. ¹⁸ I ridenat ra onggit negir wingawingat tin okas, ton kor b'igand gou wa sap yotendeneny dide tugim ke tumol yaembikeneny dide or b'iinikeneny i dide kakwulwul yomnikeneny. Si

kon ke pop Moina b'auyaena riga etenainyin negir wingawinga ewaikitam, aji ton ma ririr na. Onggit penaemb ton yit b'ugwatento.” ¹⁹ Si Yesu ten mira amninonj da, “Oo, gar ke utkunda kesa riga yepim re yu onggit gowukoyind wekeniyit! Ridede pin e Kon win kima nitibnyin? I ridede pin e Kon musik wimenand netkenyin waina gar ke utkunda kesa mile gatab? B'iga iya kor pilwa!” ²⁰ Seg re ket rigap b'iga iyo Yesum pilwa, i negir wingawingat kea Yesund yir yongonj, dide b'igand yuwongnenonj, ngirpu gou wa sap yotendonj dide tumol aembika kima yengendurkenonj. ²¹ I Yesu ti b'und yerkitonj da, “Ridede pin na onggityam mile ti pilind yiбnenenyim?” Ti b'u mira yomnonj da, “Idenata b'atomonj b'iga sobijogind. ²² I usausapyam negir wingawingat tin ongandam wul wa yiskeneny dide kwa nyi wa yiskeneny. Aji rada man ririr et nanggamog gasa omnikam onggit negir wingawingam pilwa, Man sin kear nomine dide yim nokaine!” ²³ Yesu tin yomnonj da, “Nangga ma man mindeniyit da, ‘Ra Man ririr et’? Yet ra man iminjog gar ke utkunda oramisit, God ririr e komkesa gasa motinkainy.” ²⁴ Odenja onggit b'iga ma b'u b'okta ara yikenonj dide yomnonj da, “Kon kea gar ke utkunda yokasin. Aji koina gar ke utkunda re ma ririrkipjog e, si man yim notkaet.” ²⁵ Aji Yesu kea yir anginonj riga bobo yepiya re towa pilwa yipand b'itkito yir ongongim. I ket Yesu negir kilkil wingawinga yingawonj da, “Man negir kilkil wingawinga yet re onggit b'igand yit kesa dide yipyaa dumdum yomnikenenyit! Kon mitngaen. Or opende ti pilke, dide goro kwa b'usaya b'itgarim dem ti pilind!” ²⁶ I onggit negir

wingawingat b'okta irere yikenonj dide onggit b'igand yuwongnenonj b'okta kana, ngirpu open-donj ti pilke. Si itemb re b'iga ija na wip yibnonj da uj riga re dide. Onggit penaemb jogjog rigap apurento da, “Ton ke uj e.” ²⁷ Aji Yesu tin yimind yokatonj dide tin yonyitonj. Si ket b'igat onyitonj. ²⁸ Seg ket Yesu yipa met wa b'igaronj Tina b'auyaena riga kima, dide demb de ton nena ket wekenonj yipa pipmetind. I idenatemb ket Tina b'auyaena rigap yerkito da, “Nangga pena sin maka ririr aindam itemb negir wingawinga ewaikitam?” ²⁹ I Yesu mira amninonj da, “Makwa ita yipa nya odede gasa ewaikitam, aji yir opmita danda ke* nena ririr e.”

Yesu B'usaya Tina Uj dide Utnyita Gatab Pitapita Amninonj

(Mat 17:22-23; Luk 9:43-45)

³⁰ I ingkek ket yiwato dide pis nya wuwenonj Galili nata. Aji Yesu makwa singi awonj yipa riga wumir okatam towaina wiemenapu pipmet gatab. ³¹ Mop nokip onggit winind Ton Tina b'auyaena riga na ouyaena eyeninonj. Ton ten auyaeninonj da, “Rigamna B'igand ita namb tib yii dem de rigaina yim kumb wa, si onggit rigap Tin onganji dem. I ra ton onganji dem, nowam bibirind Ton ita tutnyis dem uj ke.” ³² Aji ton maka nony aukito onggit yitkak gatab, i ton mogna aukito Yesund erkitam.

Yeté Ukojam

(Mat 18:1-5; Luk 9:46-48)

* **9:29:** Ninda Grik peband da “yir opmita dide owou uwabika danda ke”.

³³ I re ton opekto de Kaparnaum wa dide yipa met wa wekenonj, Yesu Tina b'auyaena riga arkisinonj da, “Nangga gatab na wîn yit b'ugwatenindam nyawind?” ³⁴ Aji ton mu-makesa na aukito, mop nokip kea ton nyawind yit b'ugwatento odedemb da yete ukoyam. ³⁵ I re Yesu omiti yibnonj, Ton Tina Twelp (12) itmikitijog riga ara emokinonj i amninonj da, “Ra yipa rigat man singi taet ukojog riga awowim, man b'ogla sobijogjog riga na taet, dide komkesa riga wa wiko riga na taet.” ³⁶ I Yesu yipa b'iga sobijog yokatonj dide yonyitonj towa wipind, i dide yim ke tin yikwatonj. I Tina b'auyaena riga amninonj da, ³⁷ “Yet ra yipa odede b'iga sobijogind Kor nyi kima simesime ominy rinte re wip ke dikind onyiti yibim, ton Kena simesime nominy. I dide yet ra Ken simesime notiny, ton ma Kena simesime nominy aji ton Tina yet re Ken nitmikitonj.”

*Yet Ra Ton Mera Tab ke Ibim, Ton re Men kima e
(Luk 9:49-50)*

³⁸ Yoan Yesund yomnonj da, “Ouyaena rigawii! Sin yipa riga yir yongu Moina nyi kima negir wingawinga ewaikitand. Si sin tin yiswangu da, ‘Goro yimta ke odede omnikim dem!’ Nokip ton ma ita yimta undoka miyen sin kima.” ³⁹ Aji Yesu amninonj da, “Goro tin iswanga! Mop nokip yete re kid kesa kima danda wiko yomnik kor nyi kima, onggit kak ke ton makwa ririr e wanakana Ken negir yit notiny. ⁴⁰ Nokip yet ra maka men netijgasiny, ton re mera tab ke riga e. ⁴¹ Kon iminjog nitinjin da, ‘Yet ra yipa kapo nyi motkau

kor nyi kima, nokip man Keriso ma nyi kima riga et, si tina mira ma ita awir tainy dem.'

*Negir Mile Omnikam Otonkena Mile
(Mat 18:6-9; Luk 17:1-2)*

⁴² "I ra yipa rigat odede b'iga sobijog wa wingirind yipa b'igand negir mile omnikam ominy yepim re Ken gar ke utkunda ke nokatenyi, itemb re ma sobijog bebig e tainy tinim. Aji itemb ji b'ogiljog e tinim, rako rigap tina kunakakind ukoi gimo danda kima yijobiko kai ke dide yisko ukoi sipa nyi bora wa ujim, si ma rako onggit b'igand negir mile omnikam yingawonj. ⁴³ I ra moina yipa yimit men negir mile omnikam motiny, man b'ogla itemb yim ipenjit. Itemb re b'ogiljog e mornim yipa yim kesa b'igaram ngirpu kesa yirkokar tungg wa. Aji ma b'ogil emb ji nimog yim kima meket dem de wul tungg wa rokate re osouka kesa wul dimil yimbeneny. ⁴⁴ (Awir e)† ⁴⁵ I ra moina yipa pisit men negir mile omnikam motiny, man b'ogil e itemb ji pis ipenjit mor pilke. Itemb re b'ogiljog e mornim pisdudu kima b'igaram ngirpu kesa yirkokar tungg wa. Aji ma b'ogil emb ji nimog nimog pis kima mitiskansi dem de wul tungg wa. ⁴⁶ (Awir e)‡ ⁴⁷ I ra moina yipa yirkipit negir mile omnikam motiny, man b'ogil e itemb yirkip itkasit mor pilke. Itemb re b'ogiljog e mornim yipaina yirkip kima b'igaram de ngirpu kesa God ma

† **9:44:** Ninda Grik peband da [Rokasim re uj kesa kupir wekeny riga ji kumbind dadal ngirpu kesa, dide rokate re wul dimil rinte re riga imbrika eyeniny ma ita osoukeneny dadal ngirpu kesa.]

‡ **9:46:** Ninda Grik peband da [Rokasim re uj kesa kupir wekeny riga ji kumbind dadal ngirpu kesa dide osouka kesa wul dimil yimbeneny.]

pumb tungg wa. Ají ma b'ogil emb ji nimog yírkip kima mitiskansi dem wul tungg wa,⁴⁸ rokasim re uj kesa kupir wekeny ríga ji kumbind dadal ngirpu kesa dide osouka kesa wul dimil yímbereny.⁴⁹ I komkesa gar ke utkunda ríga wul ke kilkesa si gasa im taukanj odede ringmim re yína si rigap sol esankenenanj si gasa kumbind.⁵⁰ I sol re b'ogil met omníka gasa e. Ají ra sol solmet kesa tainy, si win yimta ke nangga gasa kae tina met itenja? Si win sol pila b'obogil wiimena tuwenyit, i idenat win ngimbla mile owama iyenya wa wingirind.”

10

*Yesu Bondik Awou gatab Auyaeninonj
(Mat 19:1-12; Luk 16:18)*

¹ I Yesu ingkek ket yiwateronj dide ket yikenonj de Yuda eriya nata dide ket Yordan kílim yípa tab wa. Re ríga bobo b'usaya Ti pilwa wuwenonj, Ton ket ija na kwa ten auyaeninonj ringmena re naskand ten auyaeninonj. ² I ket ninda Parisai ríga Yesum pilwa tuwonj dide ket odede yít kima Tin yotonkeno da, “Ringma gog yítit yinj? Ra yípa rigat ti konggand bondik tominy, ton b'ogil e o ma b'ogil e?” ³ I Yesu ten mira amniononj da, “Rídede na Mose b'ingawa yoramitonj wa pilind?” ⁴ Si ton mira yomno da, “Mose ningainonj da ra yípa rigat singi tainy ti konggand bondik omniam, ton b'ogla bondik omna peba tírikau dide ket itomb kongga tewaikis.” ⁵ I Yesu ten amniononj da, “Mose onggityam b'ingawa yít wanim yírikonj, nokip waina gar re rogíkkak na. ⁶ Ají re God naska gowukoi yotobarkonj, Ton ríga amnikonj re ríga

ake kongga na. ⁷ Onggit paemb rigat ti b'u ake ti mog terar i dide ti kongga kima b'itinkisyा. ⁸ Si osiemb ji moltkongga yipaina ji i taya. Si osiemb moltkongga re ma nimog i, aji ton yipaina ji i. ⁹ Si onggit paemb rina re God yipand enkitonj, goro yet wetaweta ramin.” ¹⁰ I re ket yipa met wa b'igarkito, b'auyaena rigap Yesund yiwatinto, ngirpu Tin yerkito onggyam moltkongga bond ke awou gatab. ¹¹ Si Yesu ten mira amninonj da, “Yet ra ti konggand bondik tominy dide kwa yipa b'enga kongga tokas ti konggam, si ton gigir dide yigyig b'iyena mile e omnika iyeny itomb sisil kongga kima. Onggit gigir dide yigyig b'iyena mile ke, ton naskanyam konggand negir mile e omnika wiyenainy. ¹² I kwa ra yipa konggat ti leond bondik omny dide b'enga riga okas ti leowim, ton kea ket gigir dide yigyig b'iyena mile e omnika iyeny itemb sisil leo kima.”

*Yesu B'iga Sobijog B'ogil Amninonj
(Mat 19:13-15; Luk 18:15-17)*

¹³ I rigap towaina b'iga sobijog Yesum pilwa eyento odede nony kima da Yesu ten tasopainy b'ogil omnam. Aji b'auyaena rigap ten samany kima riga ogoka eyento b'iga iyenam Yesum pilwa. ¹⁴ Aji re Yesu yir anginonj, Ton gar soro awonj Tina b'auyaena riga wa pilwa, ngirpu ten amninonj da, “Tou b'iga sobijog Kor pilwa. Goro b'iga ogoka eyenindam, mop nokip odede b'iga wa maemb ji God ma pumb tungg. ¹⁵ I Kon iminjog wen wumir tamninyin da yet ra maka ra God ma pumb tungg iminjog ke okas odede b'iga sobijog re dide, ton makwa ita b'itgarik dem onggit God ma pumb

tungg wa.” ¹⁶ ¶ Yesu yipayipa b'iga yim ke ikwatena eyeninonj i yim aramiteninonj towa pilind b'ogil omniam.

*Jogjog Gasa kima Sisil Riga
(Mat 19:16-30; Luk 18:18-30)*

¹⁷ ¶ re Yesu menon yokatonj, nyawind yipa riga Ti pilwa b'itkonj i ket Ti pil wa kumsos b'amkonj. Seg ton ket Yesund yerkitonj da, “B'ogil ouyaena riga-wii! Nangga e kon omniken dadal ngirpu kesa yirkokar owabintam?” ¹⁸ Aji Yesu tin mira yomnonj da, “Nangga pena man Ken nogenaet da b'ogil riga? Makwa ita yete b'ogil riga aji Godta tinta yipaina. ¹⁹ Man wumir et ji opo re God ma b'ingawa yit, goro riga ongandim, goro gigir dide yigyig b'iyena mile omnika, goro yurowam, goro riga gatab yir ungati kesa b'anyginena yit usekim, goro okatim yipa riga ma gasa b'anyginena nya ke, tesnaet mor b'u ake mor mog.” ²⁰ Seg ton ket Yesund yomnonj da, “Ouyaena riga-wii! Kon kea komkesa onggityam b'ingawa yit yimta undoka eyeneninond koina kewar win ke ngirpu yu.” ²¹ ¶ ket Yesu tin yir yipkonj dide singi yiyanonj, dide ket tin yomnonj da, “Man yipa gasa e yesungaet. Si man meke! ¶ nangga gasa im re mor mi.bnainy man tasoginyit, i dide ket man komkesa osogi wulkip ogona teyeninyit gasa kesa riga wa. Ra man odede omniket, yimta ke ket mor jogjog b'ogiljog gasa opima mitibnainy dem de pumb tungg wa. Seg ket man metket Kor pilwa dide ket yimta nutundoket!” ²² ¶ onggit rigat ket as irontonj i ton ket gar bebig kima yiwaitonj, mop nokip ti jogjog gasa na yibnainonj.

²³ ¶ Yesu yirik injomkena eyeninonj dide tina b'auyaena riga amninonj da, “Jogjog gasa kima rigam b'igaram de God ma pumb tungg wa, itemb re ma sobijog bebig e.” ²⁴ ¶ ket Yesu ma odede yit map, b'auyaena rigap kid kesa aukito. Si Yesu b'usaya ten mira amninonj da, “Kor b'igawar! Utkunda! God ma pumb tungg wa b'igaram re ma sobijog bebig e. ²⁵ Ukoi ji b'angga kamel b'igaram de nidil bora wa, itemb re ji ma bebig e, aji jogjog gasa kima rigam God ma pumb tungg wa b'igaram, itemb re ji ukojog bebig e.” ²⁶ Yit seg ke B'auyaena rigap isanikesa ukojog kid kesa aukito, i ket towalenggyam b'arkento da, “Si yete ririr e yirkokar okatam?” ²⁷ Yesu ten yir epkinonj dide ket amninonj da, “Rigam onggityam gasa ti omnikam re ma ririr im, aji Godim nena Ti ririr im. Mop nokip Godim re komkesa gasa ririr im Ti omnikam.” ²⁸ Si ket Petro Yesund yomnonj da, “Yir de, sin komkesa gasa erarkitondam dide ket mena yimta undoka miyenyu. Si ringmim taukanj sowanim?” ²⁹ ¶ Yesu mira amninonj da, “Kon iminjog wen taminyin da yepiya re erarkito towa met, towa nanywar, towa yingganwar, towa mog, towa b'u, towa b'igawar, dide towa gou kor map dide God ma b'ogil yirkokar bage yit map, ³⁰ ton iminjog opima andredpyam takatanj onggit gowukoyind met, nanywar, yingganwar, mog, b'iga dide gou, aji ton opima bebig dide b'isadrena mile takatenanj riga wa pilke God ma yit yimta undokand. ¶ ton iminjog dadal ngirpu kesa yirkokar okasi dem de sisil gowukoi wa rinte ra ik dem. ³¹ Aji riga yepim re yu ukojog nyi riga pila wekeny, towa wingirind jogjog riga opima

yimta ke sobijogjog nyi riga taukanj dem. I riga yepim re yu sobijogjog nyi riga pila wekeny, towa wingirind jogjog riga opima yimta ke ukoijog nyi riga taukanj dem.”

Yesumna Nowam Bage Yit Tina Uj dide Utnyita gatab

(Mat 20:17-19; Luk 18:31-34)

³² Re ton menon yokato de Yerusalem taun wa, nyawind Yesu naskanaska nya yimayonj. Si twelp (12) itmikitijog riga gimirom kima kaktiti aukito dide kwa ninda Tina yimta undoka rigap daka mog aukito. I Yesu ket b'usaya twelp (12) itmikitijog riga kima yipand awonj, dide Ton ket amninonj Ti gatab yit rinsim ra taukanj dem Ti pilind ³³ da, “Yir de, men menon yokasu re Yerusalem ma. Yipa rigat ita Rigamna B'igand tib yii dem dide takainy dem yina mopyam si riga dide Ju riga waina gog ouyaena riga wa pilwa, i ket tonpim tirir omnyi dem Tin ongandam. I dide ton ket Tin yiyi dem de God ma obagiki kesa riga wa pilwa. ³⁴ I ton ket God ma obagiki kesa rigap Tin ngong engena kima ji malik omnika iyenyi dem, Tin auya itmanda iyenyi dem, i Tin iraska iyenyi dem, ngirpu onganji dem. Seg ket nowam bibirind Ton tutnys dem uj ke.”

Yakob ake Yoan Towaina B'arkita
(Mat 20:20-28)

³⁵ I Jebedaimna b'iga Yakobo ake Yoan Yesum pilwa tetkonda dide Tin yomnonda da, “Ouyaena riga-wii, sin singi da Man yipa gasa sowanim omniket nangga mana ra sin metirkisy.” ³⁶ Si Yesu ten mira amnonj da, “Nangga gasa mi

win singiaya Kon wanim omnikam?” ³⁷ I ket nanyingganip Yesund yomnonda da, “Ra Man king nyi okasit dem b'ogil inyomarena kima, sowa notkaet nimog pipmet omitam yipa Moina yimjog yim tab ke i yipa kwa sawai yim tab ke.” ³⁸ I Yesu ket ten amnonj da, “Win ma wumir i nangga ma win nerkisya. Rika win ririr i Koina b'idgotnena kapo nyi onayam rinte ra Kon onaen dem, dide Koina ujim baptiso okatam rinte ra Kon okasin dem?” ³⁹ Aji ton tin mira yomnonda da, “Sin ririr i.” Si Yesu mira amnonj da, “Win b'ogil i onaya dem Koina b'idgotnena kapo nyi rinte ra Kon onaen dem, dide Koina ujim baptiso okasya dem rinte ra Kon baptiso okasin dem. ⁴⁰ Aji omitam gatab it re Kor yimjog yim tab wa dide sawai yim tab wa, itemb re ma Kor ogona gasa im. Aji God towa mi ji pipmet takau dem yama na re Ton angonjenawonj.” ⁴¹ I re ten (10) itmikitijog rigap onggityam yit utkundo, ton Yakobo ake Yoan wa pilwa soro aukito. ⁴² Seg Yesu ket komkesa b'auyaena riga ara emokinonj Ti pilwa menonim dide ten amninonj da, “Win wumir im da wip iyoi riga yepim re riga angwatenanj God ma obagiki kesa riga wa wingirind, ton towaina riga wanim aukenenanj re yonggyam im, dide kwa towaina ukojog nyi rigap isanikesa danda engaenenanj towaina riga wa pilwa. ⁴³ Si wa wingirind re ma ija e ji. Aji wa wingirind yet ra singi tainy ukoi riga awowim, ton b'ogla waina wiiko riga rau. ⁴⁴ I daka kwa wa wingirind yet ra singi tainy pumbjog wa ukoi riga wiemenam, ton b'ogla komkesa rigaina goujog wiiko riga rau. ⁴⁵ Mop nokip Rigamna B'iga ma odede mop pena ikonj onggit gowukoi wa da riga

Tinim wīko rīga taukanj. Aj̄i Ton ikonj re rīga wa wīko rīga awou mana dide Tina yirkokar ke jogjog rīgaina negir mile iraba mīra okawa mana.”

*Yesu Yirdidi Rīga Bartimeond Yisakendonj
(Mat 20:29-34; Luk 18:35-43)*

⁴⁶ I ton ket tuwonj de Yeriko wa. I re Yesu Yeriko ke yiwaitonj Tina b'auyaena rīga dide ukoi rīga bobo kīma, yipa yirdidi rīga, Bartimeo it re Timaiyo ma b'iga, ton nya yiund omiti yibnenenonj wulkip b'ijenenand. ⁴⁷ I re ton utkundonj da Najaret tunggam Yesute yik, ton ket Yesund b'okta ara yiawonj da, “Dawidimna b'iga, Yesu-wii! Kear nomne-o!” ⁴⁸ Aj̄i jogjog rīgap tin samany yiyowo da, “Muma kesa ae!” Aj̄i ton kwa ara yoikindenawayonj da, “Dawidimna b'iga-wii! Kear nomne-o!” ⁴⁹ Seg ket Yesu omanda onyitonj, i ket rīga amniononj da, “Tin ara yemoka!” I rīgap ket onggit yirdidi rigand ara yemoko da, “Sam ae! Utnyite! Ton ke ara memok.” ⁵⁰ Ingkek ket ton tina kobirgim b'iskantonj, dide b'atiyakena yikonj Yesum pilwa. ⁵¹ I Yesu tin yerkitonj da, “Nangga ma man singi aet Kon mornim omnikam?” Seg onggit yirdidi rigat Tin mīra yomnonj da, “Ouyaena Rīga! Kon singi en yir opngendam.” ⁵² I Yesu tin yomnonj da, “Yiwate! Moina gar ke utkundate men misakenj.” Seg odenja ket itemb yirdidi rigat yir b'iskena yikenonj dide ket Yesund yimta yundokonj nyawind.

11

*Yesu Yerusalem wa B'igaronj
(Mat 21:1-11; Luk 19:28-40; Yoan 12:12-19)*

¹ I ton ket Yerusalem taun wuswus wa aukito dide ket opento de Betpage tungg dide Betaniya tungg wa rina re Olib dorind ebnonda. Ingkenaemb ket Yesu Tina nimog b'auyaena riga etmikitonj ² odede yit kima da, “Win eka onggit tungg wa rinte re wa wip ke yibim! Ra win onggit tungg wa b'itgarya, odenja odarya dor yipa dongki b'iga rinte re kai ke wulim pilind ijobiki yibim dide makaya yipa rigat angis tina teskak kumbind. Si win ket kai itrekyo dide iya dor kor pilwa. ³ I ra yipa rigat wen tarkis dor da, ‘Win nangga pae odede yomnikya?’ win b'ogla wumir omnya dor da, ‘Yonggyam itemb dongki b'iga singi e yominy ingawam’. Ira win yit opurena seg taya dor, itemb riga odenja e itmikis dor dikind.’’ ⁴ Re ket ton nimog b'auyaena riga opendonda de onggit tungg wa, ton kea yodaronda yipa dongki b'iga rina re ijobiki yibnonj yipa met mora wusind, ngirpu ton ket dongki kai yitrekonda. ⁵ I ninda onyiti rigap ten amno da, “Nangga pae win dongki b'iga kai yitrekyo?” ⁶ I ton ket mira amninonda rija na re Yesu ten amnonj. Ingkek ket rigap ten etmikito. ⁷ I ton ket itemb dongki b'iga iyonda Yesum pilwa dide towaina tumind kobirgin dongki kumb wa aramkinonda. Seg Yesu dongki kumb wa angitonj. ⁸ I jogjog rigap kea towaina tumind kobirgin Tina menonpu nyawind ondrika eito, i dide kwa jogjog rigap wulpip epkito sopapund dide nyawind ondrika eito ukoi isnawa kima. ⁹ I riga yepiya re ti wip nata dide ti kak nata wuwonj, ton b'okta ara kima ger itanga yiyo da,

“Osanna, sowa Yirkokar Okawa Rigam pilwa!

Ita God ma b'ogil Man kima

yete re Yonggyamim nyi kima ik!

¹⁰ Ita God ma b'ogil mera b'u Dawid ma kantrim pilwa rinte re ik!

Osanna, pumbjog Godim pilwa!"

¹¹ I re Yesu opendonj de Yerusalem taun wa, Ton ket b'igaronj de yinamet aba wa i dide Ton kwa yir eyeninonj komkesa gasa. I kea daka bibir win awir auka yikonj, Yesu ket opendonj i yikonj Betaniya wa Tina Twelp (12) itmikitijog riga kima.

*Yesu Yipa Pig Wul Sake Yomnonj
(Mat 21:18-19)*

¹² I yipa bibir kak ke re Ton yiwato Betaniya tungg ke, Yesu owoupa na awonj. ¹³ I re Yesu pajapaja yir yongonj yipa pig wul rina re jogjog rom kima yibnonj, Ton yikonj onggit wul mop wa wulkip orakam. Aji re Ton ket wul mop wa onyitonj, ton makwa pig kip yir anginonj, aji rom nena na wekenonj. Nokip itemb re ma pig kip win na. ¹⁴ Si Yesu ket itemb pig wul yomnonj da, "Makwa ita yete yimta ke mor pilke kip ou dem." Re ton pig wul sake yomnonj, kea Tina b'auyaena rigap Tina yet utkundo.

*Yesu God ma Yinanmet Kilkesa Yomnonj
(Mat 21:12-17; Luk 19:45-48; Yoan 2:13-22)*

¹⁵ Seg re ton wuwonj de Yerusalem taun wa, Yesu ket b'igaronj yinamet aba wa. I Ton ket eaukeninonj riga yepiya re Godim si gasa asogenento dide riga yepiya re imda eyenento yinamet aband. I dide ket Ton gu engendurkena eyeninonj wulkip sensi omnenuapu kasa rikind re b'engabenga wulkip wekenonj ogonam dide yinamet teks wulkip imdam, dide Godim si gasa

gimai osogapu kasa. ¹⁶ I Yesu ogoka eyeninonj da makwa ita yipa rigat gasa teyeniny yinamet aba nata. ¹⁷ I ket Yesu riga auyaeninonj dide amninonj da,

“Yina peband ija emb ji yinamet gatab iriki yibim da,

‘Rigap b'ogla Koina met yagenae yir opmitenapu met ke komkesa b'engabenga yitam wa.’

Aji winpim itemb yinamet wip yomnikya da raskol waina wimenapu met e.”

¹⁸ Si yina mopyam si riga dide Ju riga waina gog ouyaena rigap kea utkundo onggit gatab yit rina re Yesu gasa amnikinonj yinametind. I re ton utkundo da komkesa riga bobo re kea Yesu ma ouyaena ke sam kima kid kesa aenanji, ton ket Yesund moga yuwado. Si onggit penaemb ton nya oraka yiyeño Yesund ongandam. ¹⁹ I re si imokonj, Yesu dide Tina b'auyaena riga kima yipand yiawato Yerusalem taun ke.

Pig Wul Uj gatab Ouyaena (Mat 21:20-22)

²⁰ I ispari ke re ket Yesu dide Tina b'auyaena riga menon yokato de Yerusalem taun wa, nyawind ton itemb pig wul yir yongo re komkesa yarimkak uj ai na ap ke de ngirpu pipkak wa. ²¹ Si Petro re kea nonyind awaminonj Yesu ma sake yit rina re pig wulim pilwa yopulitonj. I ton ket Yesund yomnonj da, “Ouyaena Riga-wii! Yir de, itemb pig wul rina re Man sake yomnyimit re ke yarimkak uj ai e yibim.” ²² I Yesu ten mira amninonj da, “Win Godind gar ke utkunda ke yokata! ²³ Kon iminjog nitinjin da yet ra yipa rigat opulis onggit dorim

pilwa da ‘Molenggyam b'uromate dide molenggyam b'iskante sipa wa,’ dide ra ton maka nony nimognimog taeny tina garind, aji ra ton gar ke utkunda oramis da ‘Koina opuliti yit ita iminjog tawik,’ si ket itemb tina yit ita iminjog tinim tawik.²⁴ Odede paemb kon wen wumir tamninyin da nangga mana ra win yir opmita ke b'arkita taramisindam i ra win gar ke utkunda oramisyda ‘Sin ke mira akasindam,’ si ket opimemb gasa opima iminjog taukanj wanim.²⁵ I ra win yir opmitam tonyisindam, win b'ogla komresa riga wa komresa negir mile awir omnika teyenaindam rinsim re win nonyind owama eyenindam. Nokim da idenat wa B'u God yete re yibim pumb tungg wa, Todaka kwa wa negir mile awir tamnikainy.”²⁶ (Awir e)*

*Yesu ma Juwai gatab B'arkita
(Mat 21:23-27; Luk 20:1-8)*

²⁷ I Yesu dide Tina b'auyaena riga b'usaya wuwonj Yerusalem taun wa. I re Yesu menon yokatonj yinamet aba nata, odedend ket yina mopyam si riga, Ju riga waina gog ouyaena riga dide Ju riga waina elda riga ket tuwonj Ti pilwa.²⁸ I ton Yesund yerkito da, “Man nangga juwai kaim onggityam gasa amnikinyit? I yet Mor onggityam juwai mokawonj onggityam gasa omnikam?”²⁹ I Yesu ket ten mira amninonj da, “Si Kon yipa yit gatab e wen tarkisinyin. Win b'ogla mira notinya! Si onggit kak kaim Kon wen wumir

* **11:26:** Ninda Grik peband da [Aji ra win maka ra riga wa negir mile awir omnika teyenaindam, si wa B'u God yete re yibim pumb tungg wa, Todaka makwa opima wa negir mile awir tamnikainy.]

tamninyin nangga danda kaim Kon onggityam gasa amnikinyin. ³⁰ Win wumir nomna! Ringma, Yoanimna baptiso Godim pilkae ikonj, o minda rika riga wa pilkae?" ³¹ I ton towa wingirind yit b'iglenena wuwenonj da, "Ra men mira omnyu da, 'Godim pilkae,' si Ton opima netirkisiny dor da, 'Si win nangga pena maka Yoanimna baptiso gatab gar ke utkunda ke yokatonda?" ³² Ringma men jaba nitinjindam da, 'Riga wa pilkae'?" Aji ton riga bobo na mogu uwadto. Mop nokip komkesa rigap Yoanind iminjog kae yokatenyi da ton re iminjog God ma yipa bageyam na. ³³ Si ton ket Yesund mira yomno da, "Sin ma wumir im." I Yesu daka ket ten mira amninonj da, "Si Kodaka ma opima wen wumir tamninyin nangga danda kaim Kon onggityam gasa amnikinyin."

12

*Negir Greip Sopapu Wiko Riga gatab Tendam Yit
(Mat 21:33-46; Luk 20:9-19)*

¹ Seg Yesu tendam yit ke ten amninonj da, "Yipa rigat greip nangg itot eyeninonj tina gowind, i sopapund kotal eror yiyanonj, i greip kip ungka gasa oramitam gou kip yoskonj, i dide sopapu yir ipkam yipa pumbpumb met yoronganj. Seg re ket ton ninda wala riga kima yitnono aento dide tirir yomno da, 'Ra kip win okas dem, yonggyam opima sopapu mira greip kip takasiny dem.' Yit seg ke, ton ket sopapu towa akainonj dide menon yokatonj b'enga kantri wa. ² Re greip kip win yokatonj, itemb yonggyam ton yipa tina wiko riga yitmikitonj opimemb wala riga wa pilwa

sopapu ke ninda mīra greip kip okatam. ³ I wala rigap itemb tina wiko rīga yokato, yipowo, dide yitmikito mīra omni kesa. ⁴ Si yonggyam kwa nimogim tina b'enga wiko rīga yitmikitonj. Aji ton wala rigap tin mop yowarato, dide īngar kīma nenevir kana yommeno. ⁵ I ton kwa yipa b'enga yitmikitonj. Aji kea ton wala rigap kwa tin yongando uj tama na. I kwa b'usaya jogjog etmikisinonj, aji ton wala rigap kwa nīnda epouto, dide nīnda angandto uj tama na. ⁶ Seg īna yipaina ti b'igat komb awonj itmikitam yena re ton singi yiyanenonj. Si yonggyam ton kikitumam itemb tina b'iga yitmikitonj towa pilwa odede nony kīma da, ‘Ton opima koina b'igand isnai dem.’ ⁷ Aji re onggit wala rigap towa yonggyamimna b'iga yir yongo, ton towalenggyam apurento da, ‘Itemb b'iga re tina sopapu owabinta rīga e. Si b'ogil e, men tin yangandu. I men idenatemb ket owabinta rīga taindam onggit sopapum.’ ⁸ Seg ton ket tin yokato dide uj tama na yongando, ngirpu yiskanto greip sopapu bau wa. ⁹ Si nangga e ket onggit greip sopapu yonggyamit omnīk dem? Si ton ita ik dem onggit wala rīga wa pilwa dide ket ten uj tama na tanganjiny dem. I ton ket itemb greip sopapu takainy dem b'enga rīga wa pilwa. ¹⁰ Ma win maka odede yitkak agenkītondam yīna peband, īte re da, ‘Yipa Motir met oranga rigap b'isayo met orangam, aji God ket yimta ke met wugind yoramitonj onggit met emorkam.

Si Ton ket iminjog isnawa kīma Motir na awonj onggit met oranga wingirind.

¹¹ Itemb re Yonggyam Godim pilkaemb ji aukonj,

si kwa itemb re otomantijog na aukonj mera yirind'?"

¹² Si onggit Ju riga waina wiþ iyoí rigap yepiya re wekenonj onggit pipmetind, ton nya oraka eyento Yesund yimind okatam. Mop nokip ton kea wumir yokato da, "Ton sina tendam yit ke nomneniny." Aji ton riga bobo map mogá auto, i Yesund yiraro i dide ket yiwato.

Kaisam pilwa Teks Oramkam gatab Otonkena Yit
(Mat 22:15-22; Luk 20:20-26)

¹³ Si ket Ju riga waina mopyam rigap Parisai riga dide Erodimna yimta undoka riga wingirind ninda riga emdito dide etmikurto Yesum pilwa. Nokim da idenat ton b'anyginena nya ke Tina negir yit okasi dide onggit Tina yit ke Tin negir omnyi. ¹⁴ I ton ket tuwonj Yesum pilwa dide ket Yesund yomno da, "Ouyaena riga! Sin wumir im da Man iminjog riga et. I Man makwa ita yena mogá yuwadenenyit. Mop nokip Man makwa gim kaim riga wa pilind bu b'iyena mile amnikeneninyit aji komkesa riga yipa ririrkip im dimdim amnikeneninyit. Aji Man Godimna nya kaim iminjog yitkak ririrind riga auyaeninyit. Si ringma, Roma kantri mopyam king Kaisam teks ogonam, ton b'ogil e o ma b'ogil e? B'ogil e sin ogonenindam o ma sin opima ogonenindam?" ¹⁵ Aji Yesu kea towaina mile nony ke akatawonj da ton gim ke b'ogil yit im apurenanj aji towaina garind re yipa nenegir nya ke otonkena mile e yibim. Si Ton ket ten amninonj da, "Nangga pae wiñ nenegir nya ke Ken otonkena niyenya? Yipa Roma kantri

wulkip denari iya dide Ken nouyawa!” ¹⁶ I re ton iyo yipa denari, Yesu ten arkisinonj da, “Yaina wip e dide nyi e iriki i ji onggit wulkipind?” I ton ket mira yomno da, “Roma kantri mopyam king Kaisamna i.” ¹⁷ Si Yesu ten amninonj da, “Win Kaisam ogonindam nangga im re Kaisa ma ogenaya gasa, aji Godim ogonindam nangga im re God ma ogenaya gasa.” Re yit seg ke ton ma sobijog na kid kesa aukito onggityam yit gatab.

*Uj ke Utnyita gatab Otonkena Yit
(Mat 22:23-33; Luk 20:27-40)*

¹⁸ I Sadukai riga tuwonj Yesum pilwa yepiya re apurenento da, “Riga ma opima uj ke tutnikanj dem.” I ton ket Yesund yerkito da, ¹⁹ “Ouyaena riga! Mose God ma yina peband erikinonj meranim omnikam da, ‘Ra yipa riga uj tainy dide ti konggand tirar b'iga oraki kesa, ti nany o ti yingganit tokas itomb mik i ti nanyim o ti yingganim nyi kima im b'iga tarakiny.’ ²⁰ I ket seben (7) nanyingganwar wekenonj. I nanyam rigat yipa kongga wokatonj i b'iga oraki kesa uj awonj. ²¹ Si ti wus ke yingganit ti nany ma mik wokatonj i dide kwa toda b'iga oraki kesa uj awonj. I dide kwa ti wus ke yingganit toda kwa odede na awonj. ²² Si komkesa seben (7) nanyingganwar itomb yipaina konggand okatena tiyo dide uj aukito b'iga oraki kesa. Seg ket kikitumjog itomb kongga todaka uj awonj. ²³ I ra uj riga utnyita win ik dem, itomb kongga opimemb seben (7) nanyingganwar wingirind yama iminjog kongga tainy dem? Nokip komkesa seben (7) nanyingganwarpia kemb onggit konggand towa

konggam b'isatena tiyo.” ²⁴ Si Yesu ket mira amnionj da, “Win ma wumir im God ma yina peba dide God ma danda. Ma ma win onggit paemb uj ke utnyita gatab negir nya ke wumir yokatenya? ²⁵ Mop nokip ra riga uj ke tutnikanj dem, rigap ma opima kongga okata mile dide leo okata mile tamnikanj dem, aji ija im tekeny dem ringmim re aneru wekeny pumb tungg wa. ²⁶ Maka win agenkitondam uj dide utnyita gatab yit rina re Mose erikinonj God ma yina peband? God ija naemb ji Mosem pilwa yindonj Sinai dorind onggit so omni b'uwaepind da, ‘Kon re Abraamimna God en, i Isakimna God en, i dide Yakobimna God en.’ ²⁷ Si God re ma uj rigaina God e aji yilo rigaina God e. Si win kea onggityam yit wumir kesand nenevir nya ke yokatenya.”

*Yesu ma Ukoijog B'ingawa Yit
(Mat 22:34-40; Luk 10:25-28)*

²⁸ I onggit winind yipa Ju riga waina gog ouyaena riga ikonj i ket utkundenonj rija na Sadukai riga Yesu kima yit b'ugwatena wuwenonj. I ton ket wumir yokatonj gar ke da, “Yesu b'ogiljog im mira amneniny.” Seg ton ket Yesund yerkitonj da, “Komkesa God ma b'ingawa yit wingirind ringgityam e ukoijog b'ingawa yit yibim?” ²⁹ Yesu mira yomnonj da, “Ukoijog b'ingawa yit intemb ji yibim. Israel riga man utkunde! Mera Yonggyam Godta Tinta yipaina Yonggyam yibim. ³⁰ I man moina Yonggyam Godind singi yiyene moina kupkakupka kid ke, i moina kupkakupka wingawinga ke, i moina kupkakupka nony ke, i dide moina kupkakupka danda ke! ³¹ I nimogim b'ingawa

yit intemb ji singi yiyene mor rigand mada re dide! Awir e kwa yipa ukoijog b'ingawa yit yibim onggityam nimog b'ingawa yit pumb ke.”³² Segton Ju riga waina gog ouyaena rigat ket Yesund mira yomnonj da, “B'ogiljog e, ouyaena riga! Man iminjog na mindeniyit da, ‘Godta Tinta yipaina yibim, i makwa ita b'enga, aji itaemb Ton Tinta yipaina.’³³ I kwa Moina yit b'ogiljog i Godind singi iyenam komkesa kid ke, komkesa nony ke, dide komkesa danda ke. I kwa mor rigand singi iyenam mada re dide. Osiemb nimog b'ingawa yit re ukoijog b'ingawa yit i ebnya. Aji komkesa Godim pilwa oramiti Godim singi si gasa re ma ukoijog im, opi re Godim singi si gasa rinsim re men b'angga embrikenenindam dide singi gasa yogonenindam Godim pilwa yinametind.”³⁴ I re Yesu tin yir yongonj b'obogil nony kima mira omnened, Ton tin yomnonj da, “Man ma paja e aet God ma pumb tungg ke.” Seg ket makwa yipa rigat Yesund yerkitonj, nokip komkesa riga re mogna aukito.

*Dawid ma B'iga gatab B'arkita Yit
(Mat 22:41-46; Luk 20:41-44)*

³⁵ I re Yesu ouyaena eyeninonj yinametind da, “Nangga ril paim meraina gog ouyaena rigap opurena eyenanj da, ‘Keriso re Yonggyam Dawidimna B'iga e?’³⁶ Aji re Yinayina Wingawinga Dawidim nony menamena yokawonj, si Dawid Kerisom gatab yindonj tina tugimjog ke da,

‘Yonggyam God, kor Yonggyamim pilwa yinden da,

“Omite Koina yimjog yim tab ke juwai kima
piptetind,
ngirpu ra ket Kon Moina komkesa geja riga gou wa
tamninyin dem
dide taramisinyin dem Moina pis wirand
moina danda ondratenam towa kumbind!”

³⁷ Dawid tina tugim ke Kerisond yogenayonj da, ‘Kor Yonggyam’. Si ridede nya kae Keriso Dawidimna B’iga tainy? Si Ton re Dawidimna B’iga e aji kwa ti Yonggyam e.” Ukoi bobo rigap Yesu ma b’ogil nony menamena kima yit utkundeno re ukoi sam kima na.

*Ju Riga Waina Gog Ouyaena Riga gatab Nonony
Yitkak*
(Mat 23:1-36; Luk 20:45-47)

³⁸ I Yesu odede ouyaena yit ke amninonj da, “Win yir kima tekeniyit meraina gog ouyaena riga gatab. Ton singi im aenanj b’ogil pinpin kobirgim kima menamenam, i ton kwa singi aenanj riga wa pilke simesime okatam maketpu nata. ³⁹ I ton kwa ukojog wip ke pipmet akatenenanj meraina yir opmitenapu met nata, i dide kwa ton ukojog isnawa kima rigaina omitenapu kasand omitenenanj ukoi diyamdiyampu pipmet nata. ⁴⁰ I ton mik kongga waina gasa endwatenenanj, dide kwa riga ouyawam dide yir ongongim pinpin kana yir opmitenenanj. Si odede rigap opima ukojog negir mira takatenanj dem b’isagika winind, aji ninda riga re ma odede ukoi negir mira im takatenanj dem ton re dide.”

Yipa Mik Kongga ma Godim Singi Wulkip
(Luk 21:1-4)

41 Ḧ yipa wînind Yesu wulkip oramkapu boks wîp ke omitonj yinamet gasa ongapapu met wusind, dide ket yir ipka eyeninonj riñdede na rigap wulkip aramkito wulkip boks bora wa. Si jogjog gasa kima rigap aramkito re ukoi wulkip na. **42** Aji yipa gasa kesa mik kongga tikonj dide ket nimog kip sobijogjog uj peni* nena na aramitonj. **43** Ḫ re Yesu Tina b'auyaena riga ara emokinonj i ten amninonj da, “Kon iminjog wen tamninyin. Ma yipa kima rigapiya wulkip aramkanj onggit boks borand, aji onggit gasa kesa mik konggato ukojog wulkip aramis onggit komkesa riga wa wingirind. **44** Mop nokip komkesa rigap onggityam towaina ukoi wulkip wingirind sobijog kana na aramkanj. Aji itomb mik kongga re ti lesmita wulkip na aramis tina wulkip kesa wingirind. Si itemb tina oramiti wulkip re tina kupka yirkokar naemb ji.”

13

*God ma Yinanmet gatab Bage Yit
(Mat 24:1-2; Luk 21:5-6)*

1 Ḫ re Yesu yinamet yiraronj, yipa Tina b'auyaena rigat Tin yomnonj da, “Ouyaena riga-wii! Yir angine! O, nomae ukoi motir dide b'ogil otomanti met im opi!” **2** Ḫ Yesu mira yomnonj da, “Man opima yir anginyit opimemb ukojog met? Si makwa ita yipa motir ibim dem dikind onggit goujog motir kumbind, komkesa onggityam ukojog motir opima tosmurkanj dem.”

* **12:42:** Nimog kip peni re odede e it re yipa ten (10) Toya.

*Onggit Gowukoi Kikitum Win gatab Yit
(Mat 24:3-28; Luk 21:7-24)*

³ I re Yesu Olib dorind omiti yibnonj yinamet gatab ke, Petro, Yakobo, Yoan dide Andrea ton Yesund wigawiga yerkito da, ⁴ “Wumir nomnine! Riim onggityam mile pita taukanj dem? I ra onggityam komkesa gasa taukanj dem, nanggamog im ongwata gasa taukanj dem onggityam komkesa mile ririrkip omna gatab?” ⁵ Si Yesu kikitum win gatab yit yotomonj da, “Win b'obogil yir kima tekenyit! Ke rigap wen b'anyginena nya ke wip ramninem. ⁶ I jogjog riga opima tuweny dem Koina nyi kima, dide opima jogjog riga ugungatena teyenanj dem odede yit kima da, ‘Kon itemb Keriso.’ I ton jogjog riga ket opima onggit b'anyginena nya ke wip tamnenanj dem. ⁷ I onggit winind ra win tutkundenindam dem tiriiba geja yit dide tiriiba geja gatab bage yit, win goro mogatainindam dem. Onggityam gasa opima taukanj dem, aji itemb re ma kikitum win e. ⁸ I b'engabenga yitam opima gejam owinka tuweny dem ninda b'enga yitam kima. I kwa daka kantri b'engabenga opima gejam owinka tuweny dem ninda b'enga kantri kima. I opima kwa jijig taukanj dem b'engabenga pipmetind onggit gowukoyind, i dide kwa riga wa pilind opima ukojog sou win pita taukanj dem. Itemb re negir win otomapu e, odede wip e rija e ra konggat naskajog kopa okas mina b'ujena wingirind.

⁹ “I kwa win walenggyam yir b'etipkindam! Mop nokip ton opima wen pumbjog Sanedrin kot wa oramka teyenanj dem i ton opima wen ipowa teyenanj meraina yir opmitenapu met nata. I

kwa win opima towinkindam dem ukoi gabmani
 riga wa wipind dide king wa wipind, nokim da
 idenat win Kor gatab yir ungata riga taukindam
 towanim. ¹⁰ I kwa God ma b'ogil yirkokar bage yit
 b'ogla naska pitapita omnena iyenyi dem komkesa
 b'engabenga yitam riga wa wingirind. ¹¹ I ra
 rigap wen imda teyenanj dem kot wa oramkam,
 goro win naskanaska nony kubir taeninam dem
 nangga yit im win tapurenindam. Aji ra win
 opurena win okatenya, God opima wa yit ogona
 teyeniny dem opurenam. Si win ina yit tapurenin-
 dam dem. Mop nokip yit opurena riga re ma
 winpim dem, aji Yinayina Wingawingate dem. ¹² I
 gar ke utkunda riga wingirind opima towainajog
 nany o yinggaan kot wa oramka teyenanj dem uj
 ondríkam i dide kwa ti b'uít ti b'igand. I b'igap
 opima towa b'uwar ake towa mogwar geja teye-
 nanj dem dide ket ten uj ondríka teyenanj dem. ¹³ I
 kwa komkesa rigap opima wen singi kesa tamne-
 nanj dem Koina nyi map. Aji yepiya ra mimkam
 wimena tuweny ngirpu ama re de onggit gowukoi
 kikitum win wa, ton ita okasi dem dadal ngirpu
 kesa yirkokar.

¹⁴ “I kwa ita yipa mogakima negirjog gasa pita
 tainy dem yama re makwa ririr e wimenam yina
 pipmetind. Si ra win itemb negirjog gasa yir ongya
 dem onyitand yina pipmetind, —B'ogla ogenka
 rigat nony rawik — si onggit winind yepiya ra
 tekeny Yuda eriyand, win dor wa na mogamoga
 b'itkenindam dem. ¹⁵ I yet ra ton ibim dem

wimenam met papkak kumbind,* ton goro kwa nanggamog gasa imdam met wingir wa b'egarik dem. Ton komesa gasa nony b'edasin dem. Aji ton wanakana b'ek dem. ¹⁶ I dide yet ra wikkond ibim dem sopapund, ton goro kwa ritend dem tina oramiti kobirgim okatam. Ton itemb kobirgim yerar dem. Aji ton wanakana b'ek dem. ¹⁷ Si ukoi kear kima! Onggit winind dem, ngor kima kongga wa dide papa b'iga kima kongga wa pilind opima bebig dem. Nokip ton ma ririr im wanakana b'itkenanj dem. ¹⁸ Si win yir topmitenindam da itemb waina b'ikenam win goro ngiwir kima gibiljog winind rawik dem. ¹⁹ Mop nokip ra itemb win ik dem, ita ukojog bebig kima b'idgotnena pita tainy dem. Si naskand makwa yipa odede b'idgotnena pita awonj onggit gowukoyind God ma gowukoi otobarki otomapu ke ngirpu yu, i kwa makwa ita yimta ke tawik dem. ²⁰ Rako Yonggyam maka onggityam win kut yomnonj, makwa rako yipa rigat yilo okas dem. Aji Ton kea itemb win kut yomnonj Tina obagendi riga map yena re Ton abagenjinonj yirkokar okawam. ²¹ I onggit winind ra yipa rigat wen tamniny dem da 'Yir de, ite ta Keriso' o 'Yir de, ama ta Keriso,' win goro odede yit gar ke utkunda ke takatenindam dem. ²² Si opima b'anyginena Keriso dide b'anyginena bageyam pita taukanj dem. I ton kid kesa kima danda wiko dide mogakima danda wiko opima tamnikanj dem riga b'anyginena nya ke wiip omnennam. Aji daka ton kwa opima towaina kupka

* **13:15:** Onggit eriyand met papkak re rigaina wimenapu na wekenonj odede it re mera kisini o met wirand kasa re dide.

danda ondratena teyenanj dem, nokim da idenat ton b'anyginena nya ke God ma obagiki riga daka wip tamnenanj b'anyginena nya wa. ²³ Si win yir kima tekenyit, yu Kon kea naska kana wen wumir amneninyin.

*Rigamna B'iga Itendam Win gatab Yit
(Mat 24:29-31; Luk 21:25-28)*

²⁴ “Aji onggit winind ra itemb ukoi jog bebig kima b'idgotnena seg tainy,
lomkongga ita sibib tainy dem,
dide kwa ita mobiror awir tainy dem.
²⁵ I dide iki opima isoka tuweny dem wub kumb
ke,
dide kwa danda gasa rinsim re pumb wa
wekeny opima b'utuwongnenanj dem.

²⁶ Onggit winind dem rigap ita Rigamna B'iga yir iyi dem moi borand menonind ukoi danda kima dide b'ogil inyomarena kima. ²⁷ I ket itemb Rigamna B'iga ita ukoi jog bibol ara kima Tina aneru tetmikeniny dem onggit gowukoi wa, i dide Tina obagiki riga bobo tamnikanj dem gowukoi komkesa gatab ke, gowukoi ngirpu ke ngirpu wub kumb ngirpu wa.

*Pig Wulim pilke Win Ongwatam Ouyaena Yit
(Mat 24:32-35; Luk 21:29-33)*

²⁸ “I Pig wulim pilke yipa tendam yit ouyaena yokata. Si yit ija emb ji da ra wul bia rina re rom kesa rogilkak wekeny gibiljog winind, ton ket bodaboda taukanj nyi kima dide sisil wil tikkaj salsal rom kima, si win ita win ongwasya da, ‘Kemb momta e pembpemb win.’ ²⁹ Si ra win odede gasa

yir tangindam dem aukand rinsim re Kon amneninyin, win nony ke ongwasya dem da Rigamna B'iga ke nya nate dide momta e openda mora wa. **30** I Kon iminjog wen tamninyin da riga yepim re yu onggit gowukoyind wekeny, ton yimta kaim uj taukanj dem, aji naskajog onggityam komkesa gasa towa liyal im taukanj dem. **31** Si wub ake gou osiya b'eteomnenya dem, aji Koina yitkak makwa ngai opima b'eteomnenan dem.

Makwa Yete Wumir Kikitum Bibir dide Win gatab
(Mat 24:36-44)

32 “I makwa ita yete wumir onggityam bibir dide win gatab. Pumb tungg anerup toda makwa wumir im, i kwa toda B'iga ma wumir e, aji yipaina B'uta Tinta wumir. **33** Si win yir kima tekeniyit, goro yit tungim,[†] mop nokip win ma wumir im ridenate win ik. **34** Ija emb ji Koina yit ringma ra yipa rigat tina met irar i paja tungg wa yik, i ket tina wiko riga wa danda takainy yipayipa riga wa pilwa towaina wulpok wiko omnikam. I ton kwa mora yir ipka rigand ita ingau da, ‘Yir opngendi na mitibnyit!’ **35** Si onggit paemb yir opngiki wekene, mop nokip win ma wumir im ringgit win nate met yonggyam titenj, minda rika si imokand, minda sidirind, minda siwiny pauro arand, o minda ispara momtand. **36** Ra Yonggyam ridenat ra titenj, goro wen yutungand radarin dem. **37** Si itemb ji Kor yit komkesa riga wa pilwa da, ‘Yir opngiki wekene!’ ”

[†] **13:33:** Ninda Grik peband kwa da, “goro yit tungim aji yir na topmitenindam.”

14

*Ju Riga Yesund Ongandam Yisamko
(Mat 26:1-5; Luk 22:1-2; Yoan 11:45-53)*

¹ I Ju riga waina Uj Igwanti Nony Iyena Diyamdiyam Bibir dide Yist kesa Bred Win gatab re yipa win nat aukenenonda. I yipa winind re ket nimog bibir nena na yir ungawam komb awonda osiemb nimog mile aukam, yina mopyam si riga, dide Ju riga waina gog ouyaena rigap nya arakto ridede rabem nya kae Yesund wigawiga yimind usunasi dide ket uj tama onganji. ² I ton endento da, “Ma onggityam diyamdiyam win nate onganju, nokip ke riga wa wingirind soro kima bebig mile rawik.”

Yipa Konggat Ngirangngirang Gaya ke Yesund Yeaukonj

(Mat 26:6-13; Yoan 12:1-8)

³ I yipa winind Yesu yibnonj Simonimna metind Betaniya tunggind yet re naskand leprosi kopa kima yibnonj. I re Yesu owoupu kasand omiti yibnonj diyam awowind, yipa kongga Ti pilwa tikonj yipa ukoi mira kima b'ogil ngirangngirang gaya kima ogenaya da “nad” yipa otomanti alabasta gimo botolind. I itomb kongga ket onggityam gimo botol kuna yisambendonj i dide Yesum mopind kupkakupka yigmarkonj. ⁴ Re ninda rigap tina mile yir yongo, ton ket komliu aukito dide towalenggyam yit b'isateno da, “Nangga pae ton jabakipind onggityam ngirangngirang gaya yesomneny? ⁵ Mop nokip rako men onggityam ngirangngirang gaya yosogu, keakoa men ririr na ukojog wulkip yokasu rika

ama wan tausin eit andred (1,800) i ninda tumind Kina* dide ket agonindam ninda gasa kesa riga wa.” ⁶ Aji Yesu ten amninonj da, “Wirara! Nangga ma win tin bebigim il wongkya? Ton kea Kornim b'ogil mile yomnik. ⁷ Mop nokip gasa kesa riga opima win kima wekeneny ita winind. Si ra win singi taindam b'ogil gasa ke ten yim okaenam, win ririr im ita winind omnikam. Aji Kon ma ita ita winind win kima nitibnenenyin. ⁸ Nangga na re ton Kor pilind yomnik, itemb re kupkakupka tina singi dide danda kima omni ki mile emb ji. I kwa ton Koina jiwind ngirangngirang gaya yigmarik re Koina ji tulatula eungitam ongonjena mile e. ⁹ Si Kon iminjog wen tamninyin da rokate ra God ma b'ogil yirkokar bage yit pitapita omnennenyi dem komkesa gowukoyind, onggit konggamna omni ki mile daka kwa ita usenenyi dem tinim nony iyenam.”

*Yudas Tirir Yomnonj Yesund Tib Iyenam
(Mat 26:14-16; Luk 22:3-6)*

¹⁰ I Twelp (12) itmikitijog riga wingirind Yudas Iskariyot yikonj yina mopyam si riga wa pilwa, nokim da idenat ton Yesund tib yii towa pilwa. ¹¹ Si re ton yina mopyam si rigap onggityam yit utkundo, ton ma sobijog sam na aukito dide ket towaina tirir omni yit yusekawo da, “Si b'ogil e. Sin wulkip kae tib mira motinau.” Onggit kak ke Yudas ket b'ogil win oraka yiyonj Yesund okawam towa pilwa.

* **14:5:** Grik peband da “tri andred (300) Denari” I yipa Denari wulkip re yipa riga ma yipa bibir wi ko mira na.

Yonggyam kima Kikitum Diyamdiyam
(Mat 26:17-25; Luk 22:7-14, 21-23; Yoan 13:21-30)

¹² ¶ Yist kesa Bred Win wingirind, re naskajog bibir awonj, ton Ju rigap mamoi epouto ongongim Ju riga waina Uj Igwanti Nony Iyena Diyamdiyam Bibirim. Yesu ma b'auyaena rigap Tin yerkida, “Ritama Man singi aet sin menon okasu diide amaemb de sin motngonjenau Mornim owowim meraina Uj Igwanti Nony Iyena Diyamdiyam?”

¹³ Seg ket Yesu Tina nimog b'auyaena riga engaukonj da, “Ra win ekya de Yerusalem taun wa, yipa rigat wen osiya wipwip taminy dor nyikak iyoyind. Si win tin yimta undokya dor. ¹⁴ Ra ton b'itgar dor yipa met wa, win onggit met yonggyamind wumir omnya dor da, ‘Ouyaena Rigat men mominy da, “Rote ji Koina obai rum rokate ra Kon Koina b'auyaena riga kima meraina Uj Igwanti Nony Iyena Diyamdiyam omniken?”’ ¹⁵ ¶ ita ton wen tauyau dor pumb ke tula ongonjeni ukoi rum. Si win indamaemb meranim diyam ongonjenya dor.” Seg ket Yesu ten etmikitonj.

¹⁶ Si onggit nimog b'auyaena rigap yiwatonda diide ket opendonda Yerusalem taun wa. ¶ gasa ija na adarinonda ringma na re Yesu ten amnenonj, ngirpu demb de ket ton Ju riga waina Uj Igwanti Nony Iyena Diyamdiyam yongonjenonda. ¹⁷ ¶ re si yimokonj, Yesu onggit met wa opendonj Tina Twelp (12) itmikitijog riga kima. ¹⁸ ¶ ton ket owou ongonjeni kasa wa tuwonj, i ton omnikto i diide ket diyam auto. Onggit diyam awowind, Yesu amninonj da, “Kon iminjog wen tamninyin da wa wingirind yipat yete re Kon kima diyam au,

tontemb Ken tib nii dor.” ¹⁹ Si b'auyaena rigap gar bebig aukito dide yipayipa yigekeno da, “Ma konten?” ²⁰ I ket Yesu mîra amninonj da, “Ton re wa twelp (12) wingirind yipa riga e yete re Kon kima gilgil owou yisongg pleto wa. ²¹ Si b'ogil e Rigamna B'iga uj okas dem ringma re God ma yîna peband iringki Ti gatab. Aji onggit rigam yet ra Rigamna B'igand tib iyeny, ukoi kear kima e tinim, nokip ton ukojog bebig nate tau dem. Ti keako b'ogil na ji rako ton maka ukendonj ti mogim kom ke.”

Kikitum Diyampund Areto
(Mat 26:26-30; Luk 22:15-20; 1Kor 11:23-25)

²² Re Yesu dide Tina b'auyaena riga diyam auto, Yesu yipa sana nganja yokatonj i Godind siteket yit yomnonj, ngirpu ket yipkikonj dide agoninonj Tina b'auyaena riga wa pilwa. I Ton yindonj da, “Win yokata! Itemb re Koina ji e.” ²³ Seg ket Yesu kwa yipa kapo yokatonj dide Godind siteket yit yomnonj, ngirpu ket Tina b'auyaena riga wa kapo akawonj towanim onayam. I ket komkesa rigap yonayo onggit kapo ke. ²⁴ Towa onayand Yesu yindonj da, “Itemb kapond nyi re Koina outinti tirir omnijog yit kima kus e rinte re Kon yigmarken jogjog riga wa yirkokar okawam. ²⁵ Kon iminjog wen tamninyin da Kon makwa ita b'usaya onaen dem greip kip ke omniiki wain, ngirpu onggit bibirind ra Kon sisil wain onaen dem win kima demb de God ma pumb tungg wa.” ²⁶ Si diyamdiyam seg ke ton ger yitango dide ket yiawato de Olib dor wa.

*Petromna Yesund Oena gatab Bage Yit
(Mat 26:31-35; Luk 22:31-34; Yoan 13:36-38)*

²⁷ I Yesu ket Tina b'auyaena riga amnинонj da, “Win opima komkesa sap totekindam dor dide kak nitaya dor onggit mile map rinte ra tawik Kor pilind, mop nokip yit ija emb ji iriki yibim yina peband da,

‘Kon ita onganjin dem mamoi yir ipka riga,
si ket opima mamoi wetaweta b'itkenanj
dem.’

²⁸ Ajи onggit kak ke ra Kon tutnyisin dem uj ke, si win yimta kaim wuyit dem de Galili wa ajи Kon naska e neken dem.” ²⁹ Seg Petro ket Yesund yomnonj da, “Nangga ma ji ra ton komkesa rigap sap totendanj dor dide kak mitiayi dor, ajи kon kolenggyam ra makwa ita sap totenjin dor dide kak mitiaeon dor.” ³⁰ I Yesu ket tin mira yomnonj da, “Kon iminjog men motinyin da yu siwiny yimta kena pauro nimogim ara tuweny dor, ajи man naska Ken ita nowapyam notiyenyit dor.” ³¹ Ajи Petro danda kima yindonj da, “Ra Man uj taet, koda b'ogla uj rawin Man kima. Ajи kon makwa ita motiyenyin.” I komkesa b'auyaena rigap toda komkesa ija na endento.

*Yesu ma Yir Opmita Getsemanind
(Mat 26:36-46; Luk 22:39-46)*

³² I re Yesu Tina b'auyaena riga kima menon yokato yipa pipmet wa nyi da Getsemani, Yesu ten amnинонj da, “Kon yir e topmitenyin. Si win omandemb omniki wekene, ngirpu ra Kon titenjin dor wa pilwa.” ³³ I Yesu tena Ton kima eyinonj, opi re Petro, Yakobo dide Yoan, i ket

sobijog b'isonkitonj paja wa. Seg Ton ket ngor wa gar mogā dide gar bebig b'atomonj. ³⁴ Seg ket Ton ten amninonj da, “Koina wīngawīngā ma sobijog gar kopa e ainy momta uj okatam. Wīn wekene dikind dide yir opngīki wekene!” ³⁵ I re īngkek ket Ton sobijog paja wa b'isonkitonj, gou wa sap otendonj dide Godim pilwa yir opmitenonj da, “Rada Man rīrīr et, Man onggityam bebig wīn Kor pilke yewaikite!” ³⁶ I Ton kwa yir opmitonj da, “O Abu! Komkesa gasa re rīrīr im Mornīm omnikam. Onggityam Koina b'īdgotnena kapo yewaikite Kor pilke. Ajī goro Koina singi ke, ajī Moina singi kena.” ³⁷ Seg Ton ket itendonj nowa b'auyaena rīga wa pilwa i adarinonj towa yutungand. Seg Ton ket Petrond yomnonj da, “Simon! Man yīt e weget? Ringma, mor awīr e danda yīpa odede sobijog wīnind yirkokar wīmenam? ³⁸ Yir opngīki wekene, dide yir opmitenina! Nokim da īdenat maka wīn Satanamna otonkena takatenindam. Waina wīngawīngā ukoi singi im Kon kīma yir opngīki wīmenam, ajī waina jī re yarim im dide danda kesa im.” ³⁹ Onggit kak ke Yesu b'usaya yikonj dide yir opmitonj Godim pilwa odede ringmena re naskand yerkitonj. ⁴⁰ I re Ton kwa itendonj opimemb b'auyaena rīga wa pilwa, Ton kwa b'usaya adarinonj towa yutungand. I towaina yirkip re bebig na yutitip wekenonj. Si onggit penaemb ton makwa rīrīr na aukito Yesund mīra omnam. ⁴¹ Ingkek ket Yesu b'usaya nowam yir opmitam yikonj. I re itendonj towa pilwa, Ton ten amninonj da, “Wīn yutunga dide wīram nasim dadal wekenyit. Omandemb seg aina! Win ke ite ke ik. Yīpa rīga ke Rigamna B'īga tīb yii negir

mile riga wa yim kumb wa. ⁴² Utñikinam, men ket wowin Kor tib iyoyam rigam pilwa! Yir, itemb ke ton ik Kor wus wa.”

Rigap Yesund Yimind Yusunato
(Mat 26:47-56; Luk 22:47-53; Yoan 18:3-12)

⁴³ I ket onggit winind re Yesu didea yit opurenand yibnonj, Twelp (12) b'auyaena riga wingirind yipa riga Yudas ikonj yina mopyam si riga dide Ju riga waina gog ouyaena riga i dide Ju riga waina elda riga wa pilke yipand ukoi riga bobo kima yepiya re geja giri dide kibam yimind teito. ⁴⁴ I itemb tib iyozi riga, Yudas kea towa pilwa wumir yoramitonj da, “Ra yena ra kon ikwasin dor omongnena kima, itemb ji riga. Si win Tin b'obogil emorkya, i ewatinti yir ipka iya dor.” ⁴⁵ Si re ton Yudas yikonj Yesum pilwa, i odenja Yesund yomnonj da, “Ouyaena Riga!” dide Tin yomongnenonj. ⁴⁶ I odedend ket opimemb riga Yesum pilwa b'isunkurto i ket Ti pilind yim aramkito i dide ket yimind yusunato. ⁴⁷ Aji onggit winind Yesu kima owinki riga wingirind yipa rigat tina geja giri yitringatonj metkak ke, i ket yina mopyam si rigamma wiko riga ma yipa yipya rom yipmarkitonj dide ket gou wa isendonj. ⁴⁸ I ket Yesu opimemb riga amninonj da, “Ma win Kena okatam notupya geja giri dide kibam kima odede wiip ringma ra win raskol riga okasya? ⁴⁹ Bibir weanjweanj Kon wen ouyaenand nibnenenyimin yinametind, aji win maka Ken yimind nusunasma. Aji yu win odede nenegir nya ke Ken nokasya, nokim da idenat opimemb yina peba yitkak

ririrkip taukanj.” ⁵⁰ Seg ket komkesa b'auyaena rigap Yesund yiraro dide b'ikento.

⁵¹ Onggit winind yipa sisil rigat Yesund yimta yundokonj, i dide ton makwa nangga na b'ikiti yowamonj, aji ina labalaba ke tina ji b'ikangindi yibnonj. I rigap kea tin yokato labalaband. ⁵² Aji ton ket tina labalaba otokendonj dide ton wi kesa na b'ikonj.

Yesu Onyitonj Ju Riga waina Memba Wipind
(Mat 26:57-68; Luk 22:54-55, 63-71; Yoan 18:13-14, 19-24)

⁵³ I re rigap Yesund yiyo yina mopyam si rigam pilwa, komkesa yina mopyam si riga, Ju riga waina elda riga dide Ju riga waina gog ouyaena riga yipand b'eomkurto. ⁵⁴ I Petro kea Yesund pajapaja yimta undoka yiyonj, ngirpu ama re yina mopyam si riga ma met kara mora dunda wa. I ton ket ninda yinamet yir ipka riga kima yipand omitonj dide ket wul wusind gibil b'irnand yibnonj. ⁵⁵ I re kot yipangendo, yina mopyam si rigap dide komkesa Ju riga waina Sanedrin membap Yesund ongandam nya oraka eyento. Aji makwa adarkito negir yitkak Yesum gatab. ⁵⁶ Mop nokip jogjog rigap b'anyginena yit ke Ti gatab yir ungata yit apurento, aji opimemb towaina yir ungata yit re makwa yipa ririrkip aukito. ⁵⁷ I kwa daka nindap owinkito mopyam si rigam wip wa dide ket b'anyginena yit ke Ti gatab yir ungata yit apurento. ⁵⁸ Si ton odede apurento da, “Sin Tina opurena utkundonda odedemb da, ‘Ita Kon demb rigaina yim ke orangi yinamet iporken dem, i ket nowa bibir wingirind Kon ita yipa b'enga yinamet

orangen dem, si itemb met ra ma rigaina yim ke omniki e dem.’”⁵⁹ Nangga ma ji da towaina yit jogjog na, aji onggityam towaina yir ungata yit re makwa toda yipa ririrkip aukito.⁶⁰ Seg re ket yina mopyam si riga onyitonj riga wa wipind, ton ket Yesund yerkitonj da, “Nangga pae Man maka mira nomninyit? Ropim Mor pilke yit onggityam negir yir ungata yit gatab rinte re nimog rigap Mor pilwa iya?”⁶¹ Aji Yesu re mumakesa na yibnonj dide rawir kwa Ton mira amninonj. Si b'usaya kwa yina mopyam si rigat Tin yerkitonj ket da, “Ringma, Man Keriso, Godimna B'iga et yena re rigap yewangaenenyi?”⁶² I ket Yesu mira yomnonj da, “Kon itemb riga.

Win ita Rigamna B'iga yir ongya

omiti Komkesa Dandam Rigib Rigamna yimjog yim tab ke juwai kima pipmetind i kwa menonind moi kumbind wub kumb ke.”⁶³ I re yina mopyam si riga Yesu ma yit utkundonj, ton kea ket soro kima tina kobirgin yinyowendonj. I ket ton riga amninonj da, “Nangga mim men ket kwa yir ungata yit arakindam Ti gatab?”⁶⁴ Win kea Tina Godind isadrena yit utkunjya. Ridede im win singi aindam Ti gatab?” Seg ket komkesa rigap towaina negir ma b'isagika omni yit ke yomneno Yesund ongandam.⁶⁵ I ket ninda rigap Yesund kea auya itmanda yiye, i Tina wip yutwangko dide yipowo towaina yimkik ke odede yit kima da, “Yepim mipoi? Wumir nomnine!” I yinamet yir ipka rigap toda kwa Tin ipowa kima yokato.

Petro Yesund Yoenonj
(Mat 26:69-75; Luk 22:56-62; Yoan 18:15-18, 25-27)

⁶⁶ Re Petro yina mopyam si riga ma met kara wingirind kot aba wa yibnonj, yipa yina mopyam si riga ma wiko ngimngai tikonj ti pilwa. ⁶⁷ Re ket ton Petrond yir ipka yiyanonj gibil b'rnand wul wusind, i ket kwa ton tina wip b'obogil yitapnenonj, i yomnonj da, “Man yipa onggit Najaret tunggam, Yesu kima wimena riga et.” ⁶⁸ Aji Petro b'aenonj da, “Kon makwa wumir en, i makwa ita kon nony auken man nangga yit im apureninyit.” I ton ket kot aba ke yikonj mora gatab wa. [I ket pauro ara yikenonj.] ⁶⁹ I re ket onggit wiko ngimngayit b'usaya tin yir yongonj, i ton ket b'usaya yit apulisinonj riga wa pilwa yepiya re owinki wekenonj ti wusind da, “Itemb re riga yipa Tina yimta undoka riga e.” ⁷⁰ I Petro ket b'usaya b'aenonj. Seg sobijog win kak ke riga yepiya re owinki wekenonj ti wuswusind Petrond yomno da, “Iminjog e man yipa Tina yimta undoka riga et, mop nokip madaka yipa Galili riga et.” ⁷¹ Aji Petro odede negir yit ke yit yotomonj da, “Ra kon b'atinyginenyin, kon God ma sake ita okasin dem,” dide Yesum gatab danda kima tirir yit ke b'aenonj da, “Kon ma wumir en emb ji riga ya gatab im re win apurenindam.” ⁷² Seg ket odenja pauro nimogim ara yikenonj, si Petro ket kea nony aukonj yitkak rina re Yesu apureninyim ti gatab da, “Yu siwiny yimta kena pauro nimogim ara tuweny dor, aji man naska Ken ita nowapyam notiyenyit dor.” I ton ket ukoi gar bebig awonj dide yii nena ket yindonj.

15

Pilatomna B'isagika Omni Yit Yesund Ongandam

(Mat 27:1-2, 11-26; Luk 23:1-5, 13-25; Yoan 18:28-38)

¹ I isparki ke sitawarjogind, odenja yina mopyam si rigap, Ju riga waina elda riga i Ju riga waina gog ouyaena riga i dide komresa Ju riga waina Sanedrin memba kima yipand yit iglenena seg aukito dide ket yit yimjato. Seg re ket ton ket Yesund yijobiko i yiyo i dide ket Pilatom yim kumb wa yoramito. ² I Pilato Yesund yerkitonj da, “Ma Man Ju riga waina king et?” I Yesu mira yomnonj da, “Owi, kemb man mindeniyit.” ³ I kwa yina mopyam si rigap Pilatond jogjog negir yit ke yit yugwaterno Yesum gatab. ⁴ Si Pilato b'usaya Yesund yerkitonj da, “Nangga pae Man maka mira nomninyit? Man yir de, komresa towaina negir yit rinsim re ton kor pilwa eyenanj Mor gatab b'isagikam?” ⁵ Aji Yesu makwa ngai mira yomnonj, i Pilato kid kesa dide nonysipsip na awonj.

⁶ Ita Ju riga Uj Igwanti Nony Iyena Diyamdiyam winind Pilato yipayipa sibibmet riga apekeninonj Ju riga wa pilwa towaina b'arkita ririrind. Itemb re Pilatom get ke mile naemb ji yibnawonj. ⁷ I onggit winind, ninda sibibmet riga kea wekenonj yepiya re soro kima bebig mile yomniko ukoi nyi riga kima dide ton kea ninda riga angandto onggit gejand. I towa wingirind yipa Ju riga nyi da Baraba, toda kea sibibmet wa yibnonj. ⁸ I riga bobo tuwonj Pilatom pilwa dide yerkito yipa sibibmet

riga pita wa omnām onggityam tina get ke mile ke. ⁹ Si Pilato mīra amnīnonj da, “Wīn singi im kon Ju rīga wa King pita wa openjin?” ¹⁰ Nangga pena Pilato odede b'arkita yoramitonj nokip ton nony ke wumir na da Ju rīga waina membap Yesund iyi re nonyik b'iponera mapae aji Ju rīga wa pilind re kea singi ebnawonj Tin opendam. ¹¹ Aji yīna mopyam si rigapiya rīga bobo engaento da Pilato Baraband openj aji gorō Yesund. ¹² I Pilato todaka ten mīra amnīnonj da, “Si wīn kea naemb Banaband singi yomnya, si daka nangga e kon omniken onggit Rigam pilind yena re wīn yogenaya da Ju rīga waina King?” ¹³ Seg ket ton rīga b'usaya b'okta ara wuwenonj da, “Wul b'agbagind yīdrike!” ¹⁴ I Pilato towa yīt etendainonj da, “Nangga pae? Nangga ukoi negir mile na yomnikim?” Aji ton pumb wa b'okta kana ara yoikindenō da, “Wul b'agbagind yīdrike!” ¹⁵ Si Pilato singi awonj Ju rīga bobo nony rīrīr omnikam, i ton ket Baraband towa apendawonj, aji ton tina geja rīga engainonj Yesund ti wipind iraskam. I re iraska seg yomno, ton ket Tin towa yīm kumb wa yoramitonj wul b'agbagind idrikam.

*Geja Rīgap Yesund Jī Malik Yomniko
(Mat 27:27-31; Yoan 19:2-3)*

¹⁶ I onggit geja rīgap Yesund yiyo de Pilatom met wa, de onggit Ju rīga waina gou yīr ipka Roma gabmani mopyam rigamna wīkopu met kara wingir wa, dide komesa geja rīga ara emokto yīpand b'eomkitam. ¹⁷ I ton ket Yesund king pīla kuskus kobirgim yikito, i dingding kai dira pīla yogauko dide ket Ti mopind itemb dira yikito kingimna dira

pila Tin ji malik omníkam. ¹⁸ Seg ton ket ji malik omníkam simesime yomno da, “Simesime! Ju riga wa king!” ¹⁹ I dide ton Yesund mopind ipowa yiyeño buskak ke, i Tin auya itmanda yiyeño, i dide kwa Ti wipind kumsos b'amka wuwenonj ji malik omníkam. ²⁰ I re ton Yesund ji malik omníka seg yomno, ton kea itemb kuskus kobírgim yotokendawo dide ket Tinajog kobírgim yikoko, ngírupu Tin ket wip yiyo wul b'agbagind idrikam.

*Yesund Wul B'agbagind Yidriko
(Mat 27:32-44; Luk 23:26-43; Yoan 19:17-27)*

²¹ Re Yesund yiyo, towa nyawind yiipa Kurene tunggam riga nyi da Simon, Aleksandro ake Rupo towa b'u, tin wipwip yomno sopapu tungg ke opantand. I ket geja rigap Simonind danda kima yingawo Yesu ma wul b'agbag iyoyim, nokip Yesu ma ririr na ket awonj Tina wul b'agbag iyoyim de sukak wa. ²² I ket Yesund wip yiyo yiipa sukak wa tungg nyi da Golgota, engendena yitkak da “Uj Rigamna Mopkak Wimenapu Tungg”. ²³ Re ket ton onggit sukak wa opektó, geja rigap yokawo wain rina re mir kima yisleko. Mir re dimir okawa wulpoj e. Aji Yesu b'isayonj onggityam wain onayam. ²⁴⁻²⁵ Re sitawarind nain (9) kilok awonj, ton ket Tina kobírgim atogikto i ket wul b'agbagind Tin nil ke yidriko. Seg ket, ton Yesu ma kobírgim itaika eyento pes b'arena wiba ke. ²⁶ I Yesu ma onganda mop nyi yiriko Tina wul b'agbag pumb ke da,
“Ju riga wa king”.

²⁷ I kwa nimog negir raskol riga Yesu kima wul b'agbagind edriko, yiipa Tina yimjog yim tab ke

ि yipa Tina sawai yim tab ke. ²⁸ (Awir e)*
 29 I opandena rigap Yesund ugaga yiyo mop b'uwongnena kima da, “I ite namb ji Man riga. Man re mindot da, ‘Ita yinamet iporken dem i nowa bibir kima orangen dem.’ ³⁰ Si molenggyam Man yirkokar b'akae! Dide kwa Molenggyam gou wa ae wul b'agbag kumb ke.” ³¹ I kwa odede yipa wiip nya ke yina mopyam si rigap daka Ju riga waina gog ouyaena riga kima yipand Yesund ji malik omnika yiyo towa wingirind da, “Ton ninda riga yirkokar akainonj, aji Ton ma ririr e Tilenggyam yirkokar b'atkau.” ³² I Yesund yomno da, “Keriso! Ju riga wa king! Man otade gou wa ae wul b'agbag kumb ke, nokim da idenat sin yir motngu dide ket gar ke utkunda ke motkasu.” I dide osiemb nimog raskol yepiya re Yesu kima wul b'agbagind idriki ebnonda, toda kwa Yesund kea ugaga yiyeonda.

Yesu ma Uj Wul B'agbagind

(Mat 27:45-56; Luk 23:44-49; Yoan 19:28-30)

³³ Re lomtik awonj, sibibit kupka gowukoi yikangindonj, ngirpu ama re ket tri (3) kilok awonj simana gatabind. ³⁴ Re simana gatab tri (3) kilok awonj, Yesu b'okta kana ara yikenonj da, “Eloi eloi lema sabaktani?”† —engendena yitkak da, ‘Kor B'u, Kor B'u, nangga pae Man kak niaet?’ ³⁵ Si riga yepiya re Yesum wusind owinksi wekenonj, ton kea Yesumna yit utkundo,

* **15:28:** Ninda Grik peband da [Si onggityam yitkak kea ririrkip aukito rinte re God ma yina pebat yindenya da, “Rigap Tin yogeno yipand gog kesa negir mileyam kima.”] † **15:34:** Ton Aram yit kena yopulitonj, nokip itemb re yipa opurena yit na Ju riga wingirind.

ि ton ket endento da, “Yir de! Onggit Rīgat Eliya na ara yemok.” ³⁶ I yipa rīga b’itkonj i ket nyi ingmatena ingmatena matres pila gasa ke onggit tokiltokil ik besen wa yisonggonj, i dide soksok buskak ke yiponj, i yurowatonj Yesumna tugim wa onayam. I ket onggit rīgat amninonj da, “Tin yirara! Ma be men yir yangu Eliyand ita rīka ik dor Tin gou wa omnam.” ³⁷ Seg Yesu ukoi kana ara yikenonj, i ket uj awonj. ³⁸ I re Ton uj awonj, ukoi gutomgutom kobirgim rīna re yinametiñd ewirinti yibnenenonj yinayina pipmet dide yina pipmet ganggand, inyinyind b’inyowendonj pumb ke ama re de gou wa. ³⁹ I re Yesu uj awonj, yipa Roma andred (100) geja rīga mopyam Ti wip ke onyiti yibnonj yet re wiko wip yomnonj opimemb nowa rīga wul b’agbagind idrikam. Si re ton yir yongonj ridede wip na Yesu uj awonj, ton ket yindonj da, “Itemb re rīga iminjog Godimna B’iga e.” ⁴⁰⁻⁴¹ I dide demb de kea ninda kongga daka pajapaja wekenonj Yesund yir ipkand. Si onggit kongga wa wingirind kea nowa kongga yepiya re Tin yimta undoka yiyo re Tin yim okawa yiyo re Ton Galili eriya wa yibnenenonj, toda omanda wekenonj, opi re Magdala tunggam Mariya, sobijogyam Yakobo ake Yose towa mog Mariya, dide Salome. I kwa jogjog kongga yepiya re Ton kima yipand tuwonj de Yerusalem taun wa, toda kwa omanda wekenonj.

*Yosep Yesu ma Ujgim Gop wa Yoramitonj
(Mat 27:57-61; Luk 23:50-56; Yoan 19:38-42)*

⁴² I Yesu uj awonj re Ju rīga waina wiram dide yir opmitena

bibirim B'angonjena Bibir nat.[‡] I re ket momta si yimokonj, si Yesumna ujgim eungitam gangga re kea kutjog na auka yikonj. ⁴³ Si onggit penaemb Arimataya tunggam Yosep onyitonj Yesu ma ujgim eungitam. Ton re Ju riga waina Sanedrin memba wingirind yiipa ongwati riga na yibnonj dide kwa daka ton tilenggyam re God ma pumb tungg na yir yungaenenonj. Si ton ket moga kesa awonj dide ket kea yikonj Pilatom pilwa, ngirpu ton ket tin yerkitonj Yesumna ujgim okatam. ⁴⁴ Aji re Pilato yit utkundonj da Yesu kea uj awonj, ton kid kesa na awonj. Si ton ket onggit andred (100) geja riga mopyamind ara yemokonj yet re wip yomnonj wul b'agbagind idrikam, dide ket tin yerkitonj da, “Ma, minda kea Yesu kim uj ainy?” ⁴⁵ Re ket Pilato wumir yokatonj onggit andred (100) geja riga mopyamim pilke da “Kea uj ainy,” ton ket geja riga engainonj da, “Yesu ma ujgim yokawa.” ⁴⁶ Seg ket Yosep ninda riga kima bilbil kobirgim emdito, i ket ujgim wul b'agbag kumb ke gou wa yijendo dide ujgim kobirgim ke ponpon yomniko. Re ket seg, yiyo yiipa gopmet wa rina re rigap gimo yiund yesko, i ket yoramito onggit gopmet wingir wa, i dide ket ukoi gimo ururkena yiyo gopmet mora utwangkam.[§] ⁴⁷ Magdala tunggam Mariya

[‡] **15:42:** Ju rigap Praide yogenaeeno da B'angonjena Bibir, nokip onggit bibir seg ke ket Ju riga waina wiram dide yir opmitena bibir e tainy. Si ton ma ririr na towaina wiram dide yir opmitena bibirind ujgim uwonyiti iraram. [§] **15:46:** Onggityam towaina gopmet re met pila gimo dor yiuk ke eski wekenonj. Si ma yiipa kima ujgim na oramka eyenento yiipa gopmetind. I ujgim eungitam re ma gou ke imanggurka kena, aji jaba ujgim oramita nena dide yiipa ukoi gimo ke mora nena utwangki.

dide Yosem mog Mariya kea yir yongonda rikind
re Yesu ma ujgim yoramito.

16

Yesu ma Utnyita

(Mat 28:1-8; Luk 24:1-12; Yoan 20:1-10)

¹ I re Ju riga waina wiram dide yir opmitena bibir seg awonj, Magdala tunggam Mariya, Yakobomna mog Mariya, dide Salome, opimemb nowa konggap ujgimind isnikam ngirangngirang gaya emditon, nokim da idenat ton menon okasi de Yesu ma gopmet wa dide ket onggit gaya ke isniki Tina ujgim. ² I onggit Ju riga waina wiram dide yir opmitena bibir kak ke naskajog bibir awonj re Sande na, i onggit Sandend ton wuwonj Yesu ma gopmet wa sitawarjog lom ilitand. ³ Nyawind ton towalenggyam b'arkento da, “Yepim meranim gopmet utwangki gimo ururkisi gopmet mora ke?” ⁴ Aji re ton onggit gimo yiund oski gopmet wa b'obogil pumb wa yir aukito, kea ton ket yir yongo itemb ukoi jog gimo rina re ururkiti yibnonj mora ke. ⁵ I re ket gopmet wa opeko dide gopmet wingir wa b'igarkito, ton ket yir yongo yipa sisil riga yet re yimjog yim tab ke omiti yibnonj pinpin bilbil kobirgim b'ikiti. Si ton ukoi moga kima kid kesa aukito. ⁶ I ton ket ten amninonj da, “Goro moga kima kid kesa tainam! Win Najaret tunggam Yesu na orakam otupya yena re wul b'agbagind yidriko. Aji Ton ke utnyis, i Ton awir e dikind. Si win yir yonga Tina pipmet rikind re Tin yoramito. ⁷ Aji win wuwe, i Tina b'auyaena riga dide Petro wumir tamnindam dor da, “Ton naska e yik dem de Galili wa, aji win yimta kaim wuyit

dem dide ket amaemb de win Tin yir ongya dem odede ringmana re Ton wen wumir amninonj naskand.’”⁸ Onggit kak ke ket ton opekto gimo yiund oski gopmet bora ke dide b'ikto, mop nokip ton kaktiti dide moga kima nonysipsip na aukito. I ton makwa nangga yit na apurento dide makwa yena wumir yomno nokip ton ukoijog moga nat wekenonj.

(Niñda Grik peband awir e onggityam yit Mak 16:9-20. Siñnda wumir rigap endenanj da opimemb bes re ma Makit erikinonj.)

*Yesu Pitapita Awonj Magdala Tunggam Mariyam pilwa
(Mat 28:9-10; Yoan 20:11-18)*

⁹ [Re Yesu sitawarjog utnyitonj Ju riga waina wiram dide yir opmitena bibir kak ke naskajog bibir Sandend, ton naskajog pitapita awonj Magdala tunggam Mariyam pilwa ya pilkena re ton seben (7) negir wingawinga eaukeninonj. ¹⁰ Seg ket onggit konggat wikonj de Yesu ma b'auyaena riga wa pilwa yepiya re naskand Yesu kima yipand wekenonj. I re ton Yesu ma uj map gar bebig kima yii b'irinena wuwenonj, itomb konggat ket ten wumir amninonj Yesu ma utnyita gatab. ¹¹ Si re ton tin wutkundo da Yesu ke yilo ainy dide ton kea Tin liyallyalkip yir yong, ton maike itomb konggamna yit iminjogim yomno.

*Yesu Pitapita Awonj Niñog B'auyaena Riga wa pilwa
(Luk 24:13-35)*

¹² Onggit kak ke ket re Tina b'auyaena riga wa wingirind nimog riga Yerusalem taun ke yi-watonda de yipa sobijog tungg wa, Yesu b'enga wipkak ke towa wipind pitapita awonj towa menonind. ¹³ Seg, onggit nimog b'auyaena rigap ket itendonda ninda b'auyaena riga wa pilwa dide ten wumir amninonda da, “Sin kea Tin yir yongma.” Aji ton makwa towaina yit iminjogim amnikto.

*Yesu Pitapita Awonj Ileben (11) B'auyaena Riga
wa pilwa*
(Mat 28:16-20; Luk 24:36-49; Yoan 20:19-23; Itai 1:6-8)

¹⁴ Onggit kak ke, re tina ileben (11) b'auyaena rigap diyam aukito, Yesu towa wipind pitapita awonj i ket samany eyowinonj towaina gar ke utkunda kesa mile dide gimo pila rogilak gar gatab, mop nokip ton maka iminjogim amnento riga yepiya re Yesund wip yir yongo Tina utnyiti kak ke. ¹⁵ I Ton ket ten amninonj da, “Komkesa gowukoi wa wuwene, dide komkesa riga wa pilwa God ma b'ogil yirkokar bage yit pitapita omnena iyenya. ¹⁶ Yepiya ra onggityam yit gar ke utkunda ke okasi dide baptiso okasi, ton opima yirkokar okasi dem. Aji yepiya ra maka onggityam yit gar ke utkunda ke okasi, ton opima negir ma b'isagika okasi dem b'isagika winind. ¹⁷ I gar ke utkunda riga opima odede kid kesa kima danda wiko tamnikanj dem, ton kwa opima negir wingawinga teaukenanj dem Koina nyi kima, i b'engabenga sisil yit opima tapurenanj dem. ¹⁸ I ton opima negir guda kima girem towa yim ke imda teyenanj dem, aji ton makwa ita negir okatenyi dem. I ra

ton uj kima negir guda nyi tanaikanj dem, aji ton makwa ita negir okatenyi dem. Dide ra ton yim taramitenanj dem kopa riga wa pilind, si kopa riga opima b'isagika tuweny dem.”

Yesu ma Menon Pumb Tungg wa

(Luk 24:50-53; Itai 1:9-11)

¹⁹ Re ket Yonggyam Yesu towa pilwa yit opurena seg awonj, God Tin yurowatonj pumb tungg wa. ¶ Yesu ket juwai kima pipmetind omitonj Godimna yimjog yim tab ke de pumb tungg wa. ²⁰ Onggit kak ke ket Tina b'auyaena riga wuwenonj komkesa gatab wa, dide pitapita yomneno God ma b'ogil yirkokar bage yit. ¶ re ton God ma b'ogil yirkokar bage yit pitapita yomneno, Yonggyam daka ton kima yipand gilgil wiko amnikinonj. ¶ Ton ket ten danda agoninonj kid kesa kima danda wiko omnikam nokim da idenat rigap imjatenyi da towaina opureni Tina b'ogil yirkokar bage yit re iminjog e.]

**Wipi Yit God ma Yina Sisil Yina Peba
The New Testament in the Wipi Language of Papua
New Guinea
Nupela Testamen long tokples Wipi long Niugini**

Copyright © 2001 The Bible Society of Papua New Guinea

Language: Wipi

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-10-13

PDF generated using Haiola and XeLaTeX on 11 Nov 2022 from source files
dated 9 Oct 2020

a5a5213a-fb12-52b5-9c99-efb8044c6646